

1930 йил
12 майдан
чиқа
бошлаган



Послужа

ЎЗБЕКИСТОН РЕСПУБЛИКАСИ ИИБ НАШРИ

№ 66 (3296)

1999 йил 16 июль, жума

Сотувда эркин нархда

Бош муҳаррир минбари

ХАЛҚ МАНФААТИ КЎЗЛАНГАН УСТУВОР ЙЎНАЛИШЛАР

Вақт ўтиши билан ҳар биримиз босиб ўтган йўлимизга назар ташлаб, эришилган ютуқлар ва йўл қўйилган камчиликларни таҳлил қиламиз, келгуси режаларни белгилаймиз. Айнан таққослаш орқали ўзимизга тегишли хулоса чиқариб, маълум сабоқ оламиз.

Юртимиз мустақилликка эришгунга қадар мамлакатда аҳвол қандай эди? Ва Ўзбекистонда XXI асрга қадам қўйиш учун қандай тайёргарликлар кўрилмоқда? Ушбу саволларга жавоб олиш орқали янгича шароитга мослашиш борасида амалга оширилаётган катта ўзгаришлар ҳақида билиб олиш мумкин. Олиб борилаётган фаолият натижаси эса давлатимизнинг келажаги буюк, келгуси минг йилликка ҳаётимиз янгиланган ҳолда қадам қўяётирмиз, дея комил ишонч билан айтиш имконини беради.

Жамиятнинг барча соҳаларида қайта ўзгаришларга эришилаётган мамлакатимизда собиқ Иттифоқ таркибидаги бошқа давлатлардан фарқли ўлароқ ислохотлар бир меъёрда, аста-секин амалга оширилаяпти. Бу эса ўзининг ижобий натижаларини берапти. Президентимиз Ислам Каримов Олий Мажлиснинг XIV сессиясида сўзлаган "Ўзбекистон XXI асрга интилоқда" деб номланган маърузасида "Ислохотларнинг айнан босқичма-босқич амалга оширилиши, демократик ва бозор ислохотларини кучли ижтимоий сиёсат, аҳолининг ночор қатламларини муҳофаза қилиш билан уйғун олиб борилиши ижобий натижалар бермоқда. Бу ҳол, менинг назаримда, сиёсатимизнинг қўллаб-қувватланиши ва эътироф этилишига сабаб бўлмоқда" деб таъкидладилар.

Мустақил Ватанимиз барқарор ривожланиш йўлидан одимлашни давом эттираяпти. Парламентнинг кейинги сессиясида юртбошимиз келгусида ислохотларни чуқурлаштиришнинг бош устувор йўналишларини кўрсатиб берар экан, уларнинг ҳаётга жорий этилиши бундан саккиз йил илгари бошланган қайта ўзгаришлар, халқ турмушини яхшилаш ва бошқа кўзланган буюк мақсадларга эришишимизда катта аҳамият касб этишини уқтириб ўтди.

Мамлакатимиз раҳбарияти томонидан илгари сурилган мазкур беш устувор йўналишларда ривожланиш стратегияси, жамиятимизда бугунги кунда ва янги минг йилликнинг дастлабки йилларида ислохотлар ҳамда қайта ўзгаришлар қандай бўлиши ўз ифодасини топган.

Биринчи устувор йўналиш – мамлакат сиёсий, иқтисодий ҳаётини, давлат ва жамият қурилишини янада эркинлаштириш.

Иккинчи устувор йўналиш – жамият маънавиятини янада юксалтириш.

Учинчи устувор йўналиш – кадрлар масаласи.

Тўртинчи устувор йўналиш – халқ турмуш даражасининг изчил ва барқарор ўсиши, аҳолини янада кучли ижтимоий ҳимоя қилиш.

Бешинчи устувор йўналиш – жамиятдаги барқарорлик, тинчлик, миллатлар ва фуқаролараро тотувликни, сарҳадларимиз дахлсизлигини, мамлакатимиз ҳудудий яхлитлигини таъминлашдан иборатдир.

Олга силжишимизга хизмат қилувчи мазкур беш устувор йўналиш ҳаётга жорий этилиши учун мустақил юртимизнинг барча фуқаролари бор диққат-эътибор, куч ва имкониятларини ишга солишлари талаб этилади. Зеро, барча ютуқ ва муваффақиятларимиз, давлатимизнинг жаҳон ҳамжамиятида тутган ўрни ва нуфузи ана шунга боғлиқ.

"Бош муҳаррир минбари" рукни остида берилаётган навбатдаги чиқишларимизда Президентимиз Ислам Каримов томонидан кўрсатиб ўтилган устувор йўналишларнинг аҳамиятига яна тўхталиб, ушбу долзарб мавзуга қайтиш ниятимиз бор.

Ҳозир эса мамлакатимиз раҳбарияти томонидан олиб борилаётган сиёсат тўғрисида сўз юритиб ва унинг натижаларини таҳлил қилиб, сиз азиз муштарийлар билан мустақиллигимизнинг илк дамларига қайтиш ҳамда Президентимиз Ислам Каримовнинг дастлабки нутқларидан бирида ўз ифодасини топган қуйидаги сўзларни ёдга олишни истардик: "Биз шундай жамият ва сиёсий тузим яратишга киришяпмизки, унда эркинлик ва инсонпарварлик принципларига амал қилган ҳолда миллати, дини ва дунёқарашидан қатъи назар, фуқароларнинг барча ҳуқуқлари таъминланади".

Вақт мамлакатимиз етакчисининг ушбу сўзлари мустақил давлат қурилишининг асосий негизи бўлиб хизмат қилаётганини кўрсатмоқда. Вақт шунингдек, мустақил Ўзбекистон халқ манфаати кўзланган ҳамда турмуш даражасини яхшилашга қаратилган барқарор ривожланиш йўлидан асло ортага қайтмаслигига гувоҳлик бермоқда. Мамлакатимизда беш устувор йўналишни ҳаётга жорий этиш бўйича бошлаб юборилган ишлар эса буни тасдиқловчи яна бир далилдир.

Янги ҳаёт бўсағасида



ДОИМО ЭЛИМ ДЕГИН, БОЛАМ, ДОИМО ЮРТИМ ДЕГИН!

*Ички ишлар идоралари
ходими ўз сафдошлари босиб
ўтган қахрамонона ва
ибратли йўлни эъзозлаб,
уларнинг шонли анъаналарига
ўз ҳиссасини қўшишга, ҳуқуқни
муҳофаза қилувчи ва милиция
идоралари обрўсини
мустаҳкамлашга, шунингдек,
халқнинг чуқур ишончини
қозонишга интилоқни даркор.
(«КАСБ ОДОБНОМАСИ»дан)*



ЮРАГИДА ЎТИ БОР ЭДИ

3



Милиция генерал-майори Комилжон Ғопуров ҳаёт бўлган-лариди 20 июль куни 50 ёшга қаршилаган бўлардилар...

ЎЗБЕКИСТОН — ГЕРМАНИЯ:

Халқаро алоқалар
мустаҳкамланмоқда

2

АЛДАНГАН ВА АДАШГАН САБРИЯ ФОЖИАСИ

11

MUNAJJIMLAR BASHORATI

КРОССВОРД

Ойнаи Жаҳон

дастурлари-тўлалигича – фақат бизнинг газетамизда!

МАХСУС ТЕХНИКА ҲАҚИДА ГАП БОРДИ

Халқаро алоқалар

ҲАМКОРЛИК ЙЎНАЛИШЛАРИ БЕЛГИЛАНДИ

Ўзбекистон Республикаси Ички ишлар вазирлигига "Телероб ГМБХ" немис фирмасининг директори П. Паустиан, менежерлар Х. Хербе ва К. Видерманнандан иборат делегация ташриф бурди.

Мазкур фирма турли хил портлатиш воситалари ва мосламаларни аниқлаш ҳамда зарарсизлантиришга мўлжалланган махсус техника ишлаб чиқаришга ихтисослашган жаҳондаги етакчи жамоалардан бири ҳисобланади. "Телероб ГМБХ"да тайёрланаётган асбоблар бугунги кунда қулай, самарали ва ишончли эканлиги билан дунёнинг турли мамлакатларида ном чиқарган.

Бундан бир қанча вақт илгари немис фирмаси билан танишган мутахассисларимиз бу ерда лойиҳалаштириётган ва ишлаб чиқарилаётган техникалар олий дара-

жадаги сифати билан ажралиб туришини ўз кўзлари билан кўриб, улардан айримларини олиш ҳақида келишиб олишганди. Эндиликда ушбу ташрифга жавобан немис мутахассислари республика ИИБдаги ҳамкасблари билан Ўзбекистонга келтириладиган махсус техниканинг ўзига хос жиҳатларини муҳокама қилишди. Меҳмонлар келтирилган замонавий асбоб-ускуналарда ишлайдиган ходимлар ўқитувини ўз зиммаларига олишди.

Музокараларда Ўзбекистон Республикаси Ички ишлар вазирининг муовини, милиция полковниги С. Асатов, шунингдек вазирликнинг қатор бошқармалари раҳбарлари иштирок этишди.

Музокаралар дўстона вазиятда ўтиб, томонлар келгусида ўзаро ҳамкорликни янада мустаҳкамлашга ишонч билдирдилар.

Ўз мухбиримиз.

Илгари келишилганидек, Ўзбекистон Республикаси ИИБ Марказий госпиталини жиҳозлаш ва тиббиёт ходимларини ўқитиш учун ишчанлик музокаралари олиб бориш мақсадида республика ИИБда Саар замини Бундеснаппшфатсклиник (ГФР) мутахассислари А.Руффин ва В.Менне билан учрашув бўлиб ўтди.

Республика Ички ишлар вазирининг муовини, ички хизмат полковниги Ш.Мавлянов меҳмонларни кутлар экан, вазирлик тизимидаги тиббий хизмат: касалхоналар, поликлиникалар, уларнинг жиҳозланиши, тиббиёт ходимларини тайёрлашнинг ахволи тўғрисида гапириб берди. Ҳуқуқни муҳофаза қилиш идоралари ходимларига тиббий хизмат кўрсатиш даражасини яхшилаш учун бор имкониятлар ишга солинаётгани, аммо муаммолар мавжудлиги таъкидланди.

Немис мутахассислари меҳмондўстлик учун миннатдорчилик билдиришди ва ўзларини Германиядаги ажойиб аъёналарига эга бўлган "Тоғ ишчилари шифохонаси" деб номланувчи йирик ташкилотнинг вакиллари эканлигини айтишди. Ушбу ташкилот шифокорлари тиббиётнинг 70дан ортиқ соҳасига ихтисослашиб боришарди, катта тажриба тўплашган, улар ишлаётган касалхоналар жиҳозлар билан тўлиқ таъминланган.

Меҳмонлар ҳамкорликни йўлга қўйиш мақсадида бизнинг тиббиёт ходимларини Германияда ўқитиш ва малакасини ошириш, беморларимизга немис касалхоналарида саломатлигини тикланишига мўлжалланган тезкор хизмат кўрсатиш, шифохоналарни замонавий тиббий жиҳозлар билан таъминлашни таклиф этишди.

Ташриф давомида немис мутахассислари Ўзбекистон Республикаси ИИБ тиббиёт муассасаларини бориб кўришди ва жойларда ўзбек ҳамкасблари билан ҳамкорлик йўналишларини белгилдилар.

Ўз мухбиримиз.

Ўзбекистон Республикаси ИИБ ҳузуридаги "Қўриқлаш" Бирлашмасида республика ички ишлар идоралари ҳузуридаги қўриқлаш бўлинмаларининг 1999 йил биринчи ярим йиллик хизмат ва молия-ҳўжалик фаолияти якунларига бағишланган тезкор мажлис бўлиб ўтди. Унда республика қўриқлаш бўлинмаларининг хизмат ва молия-ҳўжалик фаолияти якунлари билан бирга Бирлашма шахсий таркибининг ижтимоий-сиёсий ўқиш бўйича 1998-1999 ўқув йилининг якуни ва ижро интизомии ҳолатига бағишланган масалалар кўриб чиқилди.

Амалга оширилган ишлар юзасидан "Қўриқлаш" Бирлашмаси бошлиғи, милиция полковниги Ҳ. Убайдуллаев маъруза қилди. Маърузачи республика ички ишлар идоралари ҳузуридаги қўриқлаш бўлинмалари томонидан ҳисобот даврида объект ва фуқаролар хо-

САРҲИСОБ

надонларининг ишончли қўриғини таъминлаш, иқтисодиёт объектларида майда ўғриликларнинг олдини олиш, қўриқлаш бўлинмалари шахсий таркибининг ички ишлар идоралари томонидан ўтказилаётган турли тадбирларда иштироки ва жиноятчиликка қарши кураш, жамоат тартибини сақлаш, фуқаролар ҳафсизлигини таъминлаш борасида амалга оширилган ишлар тўғрисида сўз юритди. Ҳисобот даврида республика қўриқлаш бўлинмалари ўз олдига қўйилган асосий вазифаларни удалашди — қўриқдаги объект ва хонадонларда ўғриликка йўл қўйилмади.

Иккинчи масала бўйича ҳисобот берган Бирлашма бошлиғи ўринбосари, милиция полковниги Т. Маҳкамов ижтимоий-сиёсий ўқиш бўйича ўқув йили якунлари хусусида гапирди. Бирлашмада ўқув йили давомида вазирлик шахсий таркиб билан ишлаш хизмати томонидан ишлаб чиқилган режа асосида маърузалар ўтказиб борилди. Якунлар бўйича шахсий таркибдан имтиҳонлар қабул қилинди.

Бирлашмада ижро интизоми ҳолати тўғрисида маъруза қилган ташкилий-таҳлил бўлими бошлиғи кейинги пайтларда ҳужжатлар, айниқса, юқори ҳукумат идораларидан тушаётган кўрсатмаларнинг ижросини ўз вақтида ва сифатли таъминлаш борасида самарали ишлар амалга оширилганлиги ҳақида тўхталиб ўтди. Ўтган вақт мобайнида Бирлашмада ижро интизомини бузиш ҳолларига йўл қўйилмади.

Тезкор мажлис якунида қўриқлаш хизмати олдида турган, биринчи навбатда амалга оширилиши лозим бўлган ишлар белгилаб олинди.

Шунингдек, тезкор мажлисда хизмат олдида турган долзарб масалалар аниқланиб, уларни ҳал этиш бўйича шу йил тўққиз ойлик якунларига қадар муддатлар белгиланди.

М. МИРЖАЛИЛОВ,
милиция майори.

ВАЗИФАЛАР БЕЛГИЛАНДИ

Фаргона вилояти ИИБда 1999 йилнинг биринчи ярми якунлари бўйича ҳисобот йиғилиши бўлиб ўтди.

Йиғилишни Бошқарма бошлиғи, милиция полковниги Б.Сиддиқов очиб, ҳозирги кунда республикамизда ва вилоятдаги ижтимоий-сиёсий вазият ҳамда ички ишлар идоралари ходимлари олдида турган долзарб вазифалар хусусида, уларнинг вилоятдаги тезкор вазиятни мўътадиллаштириш борасида эришаётган ютуқлари, йўл қўйган камчиликлари тўғрисида гапириб ўтди.

Бошқарма бошлиғининг биринчи ўринбосари, милиция подполковниги А.Тошхўжаев вилоятда жиноятчиликка қарши кураш, унинг олдини олиш бўйича эришилган натижаларга батафсил тўхталди.

У вилоятда умумий жиноятчилик камайганига қарамай, айрим шаҳар ва туманларда бунинг акси бўлганини айтди.

Шунингдек, вилоят ИИБ бошлиғи ўринбосари, мили-

ция подполковниги А.Абдуллаев шахсий таркиб билан ишлашнинг ахволи, хизмат интизоми ва қонунчиликни мустаҳкамлаш хусусида гапириб ўтди. У вилоят ички ишлар идоралари учун "Тарбия ва интизом кун"и деб эълон қилинган душанба кунлари ўтказиладиган тадбирларнинг савиясини ошириш, ходимларнинг ўз устида ишлашлари учун шароит яратиб бериш лозимлигини таъкидлади.

Жойлардаги ички ишлар идораларининг раҳбарлари кўрилган масалалар бўйича ўз фикр-мулоҳазаларини билдирдилар.

Йиғилишда биринчи ярим йил якунлари ва галдаги вазифалар бўйича тегишли қарорлар қабул қилинди.

Б.ОМОНЗОДА,
Фаргона вилояти ИИБ
матбуот гуруҳи катта
инспектори,
милиция катта лейтенанти.

ЁШ КАДРЛАР БИЛАН МУЛОҚОТ

Қарор
ва ижро

Мамлакатимизда "Кадрлар тайёрлаш миллий дастури тўғрисида"ги Қарор қабул қилинганига икки йил бўлмоқда. Дастурнинг моҳияти таълим соҳасини тубдан ислоҳ қилиш, уни ўтмишдан қолган мафкуравий қарашлар ва сарқитлардан тўла халос этиш, ривожланган демократик давлатлар даражасида юксак маънавий ва ахлоқий талабларга жавоб берувчи юқори малакали кадрлар тайёрлаш миллий тизимини яратишдан иборат бўлиб, ҳозирда бу вазифалар босқичма-босқич амалга оширилмоқда.

Айни кунларда ҳуқуқшунос маълумотига эга мутахассисларга бўлган эҳтиёж катталиги, эркин бозор иқтисодиётига асосланган ҳуқуқий-демократик давлат ва фуқаролик жамияти барпо этишда, айниқса, бу ҳол ўзининг таъсир кучини кўрсатаётганлиги ҳеч кимга сир эмас.

Андижон вилояти ички

хизмат қилаётган ёш мутахассис ходимлар билан учрашув, жонли мулоқоти бўлиб ўтди.

Бошқарма бошлиғи ёш мутахассислар олдида турган муҳим вазифалар, айниқса, республика раҳбариятининг малакали кадрлар тайёрлаш борасида юритаётган сиёсатидан келиб чиқаётган вазифалар тўғрисида сўзлаб, милиция ходими деган шарафли номга муносиб равишда хизмат қилиш давр қўяётган талаблардан бири эканлигини алоҳида таъкидлади.

Шунингдек, ёш авлоднинг ички ишлар тизимида хизмат қилиши учун яратилган шарт-шароитлар, жиноятчиликнинг олдини олиш, унга қарши

кураш, намунали жамоат тартибини сақлаш, фуқаролар ҳуқуқ ва манфаатларини муҳофаза қилиш ишларида тўпланган муайян тажрибалар ҳақида ҳам сўз бориб, дилдан суҳбат қурилди. Ёш мутахассис кадрлар ўзларининг назарий билимларини бугун амалиётда мустаҳкамлаб бораётганликлари, ўз соҳаларига бўлган қизиқишлари янада ортанлиги, хизмат давомида учраётган айрим муаммоларни бевосита раҳбарлари ёрдамида мустаҳкамлаб қилиб бораётганликлари тўғрисида сўзладилар.

Адҳамжон ИСКАНДАРОВА,
Андижон вилояти ИИБ
катта инспектори,
милиция лейтенанти.

"Адолатпарварлик, ҳалоллик ички ишлар ходимлари кундалик фаолиятининг асосий мезонидир" — Тошкент шаҳар ИИББ ходимлари билан ўтказилган навбатдаги маърифат дарси ана шу мавзуда бўлди.

Алишер Навоий номидаги санъат саройида тўпланганларга дастлаб Бош бошқарма Матбуот маркази ходимлари томонидан тайёрланган фильм намойиш этилиб, унда ҳуқуқ ҳимоячиси деган шарафли номга доғ туширган ички ишлар ходимлари ҳақида сўз борди. Мисолларга мурожаат қилайлик. Қўриқлаш хизмати ходими хизмат вазифасини суниестемол қилиб хусусий тадбиркордан катта миқдордаги пулни товламачилик йўли билан олаётганда қўлга олинди. 16 йил хизмат қилган Сирғали тумани профилактика инспектори ҳам нафс қурбонига айланди. У муқаддам қамалиб чиққан кимсадан

ЯХШИДАН ОТ, ЁМОНДАН...

пора олаётганда тумшугидан илинди.

— Ички ишлар идоралари ходимлари озод Ватанни ҳимоя қилиш, мустақиллигимизни мустаҳкамлаш йўлида бор куч-ғайратларини аямаядилар. Бунинг кейинги воқеалар тимсолида ҳам кўрдик, — деди сўзга чиққан Ўзбекистон халқ ёзувчиси, Олий Мажлис депутаты Пиримқул Қодиров, — бироқ улар орасида баъзи нобокорларнинг чиқиб қолиши бошқаларга ҳам иснод келтиради. Ишонамизки, орангизда бундайларга ўрин йўқ.

— Сафларингизда иймонли, эътиқодли ходимлар жуда кўп, — дея гапини бошлади республика Вазирлар Маҳкамаси ҳузуридаги Диний ишлар қўмитаси раиси Фозил қори Собиров, — биз бунинг кўриб-билиб турибмиз. Пайғамбаримиз айтиб ўтганларидек, инсонни йўлдан оздирувчи нарсалардан бири порахўрликдир. Кимки пора олиб кун кечираман деса, янглишади. Оллоҳ бундай кишиларнинг жазосини албатта беради. Бунинг ҳаётда кўп кўриб юрибмиз.

Бошқа сўзга чиққанлар ҳам асосан бугун юртимиз ҳаётида юз бераётган ижобий ўзгаришлар, олдимизда турган вазифалар ҳақида гапирди.

— Биз бугун катта ижодкорлик ишларини амалга оширяпмиз, келажаги буюк давлат қурапмиз. Ана шу хайрли ишга ҳар биримиз муносиб улушимизни қўшишимиз керак, — деди ИИББ бошлиғи, ички хизмат генерал-майори Р. Ҳайдаров.

Албатта, ўз соҳамизда ҳар биримиз фидойи бўлишимиз керак. Акс ҳолда умумий ишимизда унум, барака бўлмайд.

Тадбир сўнггида ёш зобитларга лейтенантлик унвонлари тантанали топширилди. Бош бошқарма ходимларининг ютуқ ва тажрибаларини оммавий ахборот воситалари орқали ёритишда фаоллик кўрсатган журналистлар эсдалик совгалари билан тақдирландилар. Маърифат дарси йиғилганларда катта таассурот қолдирди.

М. АБДУЛЛАЕВ,
ИИББ ходими.

ЮРАГИДА ЎТИ БОР ЭДИ...

“...Хотира деганда биз фоний дунёдан ўтган аждодларимизни эслаш, уларнинг чирогини ёқиб, эзгу ишларини давом эттиришни тушунамиз. Бу халқимизга хос азалий фазиладир.

Хотираси бўлмаган, тарихини унутган, ўз аждодларининг қадрига етмайдиган миллатнинг истиқболи йўқ. Бу ҳақиқатни кишилик тарихи исботлаб турибди”.

И. КАРИМОВ.

Жамиятимизнинг негизи, давлатимизнинг таянчи бўлмиш фуқаролар, уларнинг онгли меҳнати, Ватанга садоқати – эътиқоди билан мамлакатимиз кундан-кунга гуллаб-яшнамоқда, мустақиллигимиз мустаҳкамланиб, ўзбек миллати, Ўзбекистон номи бепоён дунёнинг турли сарҳадларида ўз ўрнини, қадрини, дўсти-ҳамкорини топмоқда. Элнинг суҳрати – унинг иймони бут, эътиқоди бутун фарзандлари туфайли дейдилар.

Чунки бундай фарзандлар биринчи навбатда Ватани, халқи осойишталигини, шон-шухратини, гуллаб-яшнашини ўйлайди, шу йўлда ҳалол меҳнат қилиб, кадр, обрў-эътибор топади. Ўз ортдан минглаб ҳамюртларини эргаштириб, халқ бахти – саодати йўлида чироқ бўлади. Бундай инсонларга қарата: “Ўзи ҳам тинмайди, бошқаларни ҳам тинчитмайди. Олов бўлиб, ёниб яшайди”, – дейдилар.

Ана ўша эл-юрт ташвиши-

да тиним билмас, олов бўлиб яшаган ажойиб ва тенгсиз инсонлардан бири Комилжон Қодирович Ғопуров эди.

Тошкент вилоятининг Тошкент туманида туғилган Комилжон 1971 йилда Тошкент Давлат университетининг ҳуқуқшунослик факультетини битирди-ю, Яққасарой тумани ИИБ тергов бўлини масида терговчи бўлиб иш бошлади. Унинг ҳар бир ишга сидқидилдан, астойдил ёндошиб, ҳалол ва одиллик билан иш олиб бориши тезда ҳамкасблари орасида тилга тушди, раҳбарлар эътиборини тортди. Уни Тошкент вилояти Зангиота тумани ИИБга суриштирувчи, терговчи, кейин бош терговчи лавозимларига тайинландилар. У ҳалол меҳнати билан ҳамкасблари орасида иззат-ҳурмат топди. Ёш ходимдаги иқтидор ва меҳнатсеварлик уни хизмат пиллаполярларидан кўтарилиши учун мезон бўлди. У Тошкент тумани ИИБ тергов бўлини маси бошлиғи, бошлиқнинг биринчи ўринбо-

сари, бошлиқ лавозимларида хизмат қилди.

Йиллар ўтгани сайин жамият тараққий топиб, янгилашиб, сайқаллашиб боради. Бу эса шу жамият аъзоларидан замон билан ҳамнафас бўлишни, давр билан баробар, имкони бўлса, бир одим олдинда юришни, жамият тараққийи учун меҳнат қилиш билан бирга ўз устида тинимсиз ишлаш, излаш, ўқиб-ўрганиш, билим олишни тақозо қилади. Буни яхши англаган Комилжон Ички ишлар вазирлиги Академиясида таҳсил олиб билимини янада бойитди, касб маҳоратини оширди.

Комилжон Тошкент вилоят ИИБ бошлиғининг Тергов ишлари бўйича ўринбосари, биринчи ўринбосар, вилоят ИИБ бошлиғи лавозимларида ишлаганида ҳам асосий хусусияти – инсонийлик, олижанобликни тарқ этмади. Амали, уновони ошгани сайин унинг инсонпарварлик, ватанпарварлик, меҳнаткашлик хусусиятлари ҳам ортиб борди.

Милиция генерал-майори Комилжон Ғопуров 1992 йилда Тошкент шаҳар Ички ишлар Бош бошқармасига бошлиқ этиб тайинланди. Ёш, лекин билимли, тажрибали раҳбар мустақиллигимизнинг да-



стлабки йилларидаги тезкор вазиятнинг ўзгарувчан бўлиши, ҳушёрлик салгина бўлмаса ҳам жиноятга мойил кимсаларга қўл келишини англаб етди. Шу боис, ўзи раҳбар бўлган ички ишлар идоралари билан тез-тез учрашиб, жиноятчиликнинг олдини олиш ва унга қарши курашишда ички ишлар ходимларининг вазифалари, бурч ва мажбуриятлари ҳақида тез-тез суҳбатлар ўтказди, интизом, ўқиш-ўрганиш, касбий, жисмоний маҳоратини ошириб бориш, фуқаролар билан доимо ҳушмуомалада бўлиш, ёрдамга муҳтож одамларга бефарқ қарамаслик, ўзаро аҳиллик кабиларни доимо уқтириб бу борада ўзи ибрат бўлди.

Комилжон Қодирович ходимларнинг шахсий, оилавий ҳаётини кўздан қочирмасди. “Оиласидан кўнгли тўқ бўлмаган ходим яхши хизмат қилолмайди” дерди у ва ёрдамга муҳтож ходимларга турли

қўмаклар уюштириб, муаммоларини ҳал қилмагунча тинчмасди.

К. Ғопуров учун ички ишлар хизмати турларининг беғонаси йўқ эди. У вақтининг тигизлигига қарамай тезкортергов ходимлари билан воқеа содир бўлган жойга шахсан ўзи боради, дастлабки ҳужжатларни синчиклаб ўрганиб, зарур йўл-йўриқлар беради. Патруль-пост хизмати шахсий таркиби билан мунтазам учрашиб, улар билан турли мавзуларда суҳбатлар ўтказар, маслаҳатлар беради.

Комилжон Ғопуров жиноятчиликка, айниқса, унинг уюшган турларига қарши мурасасиз кураш олиб бориб, пойтахтимизда ижтимоий-сиёсий вазиятни барқарорлаштириш, фуқароларнинг тинч-осойишта яшашини, меҳнат қилишини таъминлашга катта ҳисса қўшди. Комилжоннинг милиция кучларини моҳирона бошқара олиш билан бирга доимо халқ орасида бўлиши, фуқаролар, талаба-ёшлар, мактаб ўқувчилари билан мунтазам алоқада бўлиб, тез-тез суҳбатлар ўтказиб, мавжуд муаммоларни ечишда аҳоли билан, турли идора ва ҳўжалик раҳбарлари билан бамаслаҳат иш олиб бориши жиноятларнинг сезиларли камайишига, осойишталик, ҳуқуқ-тартибот ва қонун устуворлигининг юксалишига сабаб бўлди.

Тошкент шаҳар ИИББда К. Ғопуровнинг ўринбосари

эдим. У киши билан ишлаган давримда мен бу инсоннинг юрагидаги эл-юртга, касбига нисбатан юксак меҳрни, шу меҳр туфайли тиниб-тинчимаслигини, ишчанлигини ҳис қилар, кўриб-билардим. У вақт билан ҳисоблашмай ишлар, хизмат натижаларини ўзи таҳлил этар ва уларнинг натижаларига одилна баҳо беради, кечиктирмай зарур қарорларни қабул қиларди. Ўзининг интизоми, меҳнатсевар, ҳалол ва жиддийлиги билан кўпчиликка ўрнак эди.

Комилжон Ғопуров Ватанига садоқат билан хизмат қилган, ўзидан ўчмас из, кўплаб шогирдлар қолдирган, Тошкент шаҳри милицияси тарихига кирган Ўзбекистонимизнинг асл фарзандларидандир. У ички ишлар идораларидаги бенуқсон хизматлари учун қатор орден ва медаллар билан мукофотланган.

Ажойиб инсон, эл-юрт осойишталиги йўлида сўнги нафасигача хизмат қилган сафдошимиз, эндиликда марҳум милиция генерал-майори К. Ғопуров ҳаёт бўлганида энди 50 ёшга кирарди. У қисқа, лекин мазмунли ҳаётда элим деб, юртим деб ёниб яшади. Унинг юрагидаги ёлқинлар – шогирдлари қалбига кўчган ва ўйлайманки, дўстимиз, устозимиз Комилжон Ғопуровнинг хотираси ҳамма вақт қалбимизда қолади.

С. АСАТОВ,

Ўзбекистон Республикаси Ички ишлар вазирлигининг ўринбосари, милиция полковниги.

Шу сонга хабар

МАТБУОТ АНЖУМАНИ БЎЛИБ ЎТДИ

Ички ишлар вазирлигида Республикаимиз оммавий ахборот воситалари ва мамлакатимизда фаолият кўрсатаётган чет эл журналистлари учун матбуот анжумани бўлиб ўтди.

Анжуманни Матбуот маркази бошлиғи милиция подполковниги Ботир Зияев олиб борди. Унда Тошкент шаҳар ИИББ Тергов бошқармасининг раҳбар ходимлари иштирок этдилар. Журналистларга ўзбекистонлик ёшларни алдаб, уларни яширин равишда Афғонистон ва Тожикистон республикаларидаги ҳарбий лагерларга жўнатиш билан шуғулланган, 1991 йилдан буён “Ислом лашкарлари” диний экстремистик ташкилотнинг фаол аъзоси, Фарғона вилоятининг Кўқон шаҳрида яшовчи, 1959 йилда туғилган Равшан Ҳамидовнинг қўлга олинганлиги, уни Тошкент шаҳрининг Юнусобод тумани 13-мавзесида яшовчи Маҳбуба Қосимованинг уйда яшириниб ётгани ва у ердан қўлга олингани хабар қилинган эди.

Маҳбуба Қосимова, ўз сўзига кўра “Инсон манфаатларини ҳимоя қилиш норасмий ташкилоти”нинг аъзоси бўлган.

Яқинда Юнусобод тумани суди раиси вази фасини бажарувчи Э. Юсупов раислигида бўлиб ўтган суд жараёнида М. Қосимованинг оғир жиноят содир этиб, қидирувда бўлган Р. Ҳамидовни қонунга хилоф равишда беш ой, яъни 1998 йилнинг декабр ойдан 1999 йилнинг 12 майгача уйда яширинча сақлаб келгани ўз исботини топди.

Бундан ташқари М. Қосимова фирибгарлик жиноятини ҳам содир этган – кўшниси Б. Мусаев жиноят содир қилиб милиция ходимлари томонидан қўлга олингани боис унинг умр йўлдоши Д. Мусаевага ўзини норасмий ташкилот аъзоси эканлигини, ҳуқуқий ёрдам беришини айтиб, кучли адвокат топиб бераман деб алдаб, унинг 50 минг сўм пулини олган ва ўзлаштирганлик факти ҳам исботланди.

М. Қосимова аввал ҳам судланган бўлиб, амнистия туфайли жазони ижро этишдан озод қилинган.

М. Қосимова ҳақидаги гўё у қонунсиз жазога тортилди, деган миш-мишлар асоссиз бўлиб, у Ўзбекистон Республикаси Жиноят Кодексининг 241-моддаси 2-қисми яъни “Жиноят ҳақида хабар бермаслик ёки уни яшириш” ҳамда 168-модданинг 2-қисми “а” банди – “Фирибгарлик” жиноятлари бўйича судланиб, Юнусобод туман суди томонидан 5 йилга озодликдан маҳрум қилингани ва қасацион аризаси бериш имкони берилгани анжуман иштирокчиларига маълум қилинди.

Ўз мухбиримиз.



Аҳмаджон САПАРМАТОВ олган суратлар.

Шу кунларда Бўстонлик тумани ИИБ Чорвоқ қишлоқ милиция бўлини масида ишлар ҳар қачонгидан тигиз. Чунки биргина Хўжакеңт қишлоқ фуқаролик йиғини ҳудудда йигирма олтига дам олиш маскани ва олтига болалар оромгоҳи мав-

СУРАТЛИ АХБОРОТ

жуд. Милиция ходимлари бу жойларда ҳордиқ чиқараётганлар ўртасида профилактик тадбирлар ўтказиш учун бор сай-ҳаракатларини аяшмаётир.

Суратларда: ВЕИН нозир, милиция лейтенанти Қ. Солметов “Лочин” болалар оромгоҳида ёз гаштини сураётган болалар даврасида;

Чорвоқ қишлоқ милиция бўлини маси участка инспектори, милиция лейтенанти Б. Йўлдошев ва Хўжакеңт қишлоқ фуқаролар йиғини раиси Э. Ашуровлар навбатдаги ишлар хусусида маслаҳатлашишяпти.

ПОСБОНЛАР БИЗГА МАДАДКОР

Жамиятда тинчлик, осойишталикни сақлаш, жиноятчиликнинг олдини олиш ва унга қарши курашда ички ишлар ходимлари билан жамоатчиликнинг биргаликдаги ҳаракатлари катта ижобий натижалар бериши ҳақида кўп гапирамиз. Албатта, бутун оғирликни милиция ходими ташлаб қўйиб, бу сени вазифанг, маошини олганингдан кейин эплагинда, деб бир четда қўл қовуштириб туриш инсофдан эмас. Чунки, менинг назаримда бугуннинг одамларини, айниқса, ёшларни доимий назоратда тутиш керак. Катта бир қишлоқда биргина участка вакили бу ишни тўла эплаши қийин. Шу ўринда маҳалла посбонларининг ташкил этилиши айтиш мумкин бўлди.

Қишлоқ фуқаролар йиғини фаоллари билан келишиб, туман ички ишлар бўлимига 10 нафар йигитни маҳалла посбонлари таркибига тавсия этдик. Бу ишда участка вакили милиция капитани Умаржон Холбоев фаол қатнашди. Ўзи яхши оилада ўсиб улғайган, қишлоқда ҳуқуқ, одоб билан на-

муна олса арзийдиган Тоҳимурод Ҳайдаровни посбонлар сардори этиб тайинладик.

Ҳудуддаги Бобур ва Улғубек номли фермер ҳўжаликларида тинчлик ва осойишталикни сақлашда посбонлар фаоллик кўрсатишяпти. Тўйларда участка вакили бош бўлиб, маҳалла посбонлари хизматда бўлса, кўнглимиз хотиржам бўлиб ўтирамиз. Ярим тунда кўчада санжидиганлар, тўп-тўп бўлиб бурчак-бурчакда туриб олиб, ўтганнинг ўроғини, кетганининг кетмонини оладиганлар кўринмай қолди.

Энг қувонарлиси, маҳалла посбонлари эл оғзига тушди. Милициянинг таянчи, бизнинг мададкоримиз маҳалла посбонларининг фаолиятини янада мукамаллаштириш зарур. Бунинг учун уларнинг ҳаракатларини қўллаб-қувватлаш, мавқеини кўтариш керак. Халқ маҳалла посбонлари хизматини ҳурмат қилсин.

Илбс ХУДОЙБЕРДИЕВ,
“Оқ олтин” туманидаги Бобур номли қишлоқ фуқаролар йиғини раиси.

АТРОФЛИЧА ТАҲЛИЛ ЭТИЛДИ

Яқинда Сурхондарё вилояти ИИБда ўтган олти ойлик якунларига бағишланган ҳисобот йиғилиши бўлиб ўтди. Бошқарма бошлиғи, милиция полковниги Қ. Бобокўлов йилнинг биринчи ярмида ички ишлар идоралари ходимлари томонидан амалга оширилган ишларни атрофлича таҳлил этди.

Вилоятда тинчлик, осойишталикни сақлаш, жиноятчиликнинг олдини олиш, унга қарши курашиш, жамоат тартибини сақлаш, ёнгин хавфсизлигини таъминлаш ва бошқа ишлар борасидаги вазифалар аниқ белгиланган режа, тадбирлар асосида олиб борилди.

Кўзда тутилган натижаларга эришиш билан бир қатор камчиликларга ҳам йўл қўйилди. Пировардида маърузачи амалга оширилиши лозим бўлган масалалар хусусида кенг тўхталди.

Ошқора, танқид руҳида ўтган йиғилишда вилоят ҳокимлиги ва ҳуқуқ-тартиботни муҳофаза қилувчи идоралар раҳбарлари иштирок этдилар.

С. АБДУВОҲИДОВ.

ХУШЁРЛИК ХАТАРГА ҚАЛҚОН

Йўллар, йўллар... Кун сайин серкатновлиги ошиб бораётган, автомобиллар тури ва сони кўпайиб кетаётганига гувоҳ бўлаётган магистрал йўллар, чорраҳалар, шох кўчалар... Улар замонанинг қон томирлари, ҳаёт ришталарини боғловчи, йироқларни яқин, оғирни енгил қилувчидир. Шу сабабли йўллар бехатарлиги, қатнов маданиятига эътибор, қатъий назорат лозим. Бу мураккаб ва муқаддас вазифани йўл ҳаракати кузатувчилари – давлат автомобил нazorати ходимлари амалга оширадилар. Касбига садоқатли, аини пайтда ёш ДАН ходимларига устозлик қилиб, иш ўргатиб келаётган Жиззах вилояти, Зарбдор туман ИИБ ДАН бошлиғи, милиция майори Баҳодир БОБОМУРОДОВ шундай сўз юритади:

– Аини кунларда ёзги таътил мавсуми бошлангани муносабати билан йўловчилар сони ёшлар, болалар ҳисоби-га кўпайиб бормоқда. Мактаб ўқувчиларини оромгоҳларга жўнатиш ҳам бир мавсумдир. Шунинг учун бугунги кунда ҳуқуқ-тартибот тизими ходимлари, айниқса, ДАН ходимлари зиммасидаги масъулият янада ошди. Шу мақсадда маъмурий амалиёт, суриштирув-қидирув бўлимлари ходимлари, катта йўл нозирлари, йўл назоратчилари, умуман, барча ДАН ходимларининг диққат-эътибори йўл осойишталигини таъминлашга қаратилган. Йил бошида техник кўрик ўтказилди. Бунда 813 та автомобилотранспорт, шахсий йўналишда эса 1960

та, умуман, шу даврда 2754 та қоидабузарликларни аниқ-

апрелдан 10 майгача “Тоза ҳаво”, 17 апрелдан 17 майгача “Пиёдалар” тадбирлари ўтказилди. Ҳозирги кунда далаларга одам ташувчи транспортлар хавфсизлигини таъминлаш мақсадида темир йўллар билан кесишган жойларда ҳушёрликни янада ошираямиз. Ҳозирги кундаги долзарб вазифаларимиздан бири галла ўрим-йиғими мавсумини кўнгилдагидек ўтказиб олишдир.

Саъй-ҳаракатларимиз натижасида умуман беш ой мобайнида ўтган йилдагига нис-

дилдан ўтаётган милиция сержанти Фахриддин Донабоев вилоят ИИБ Фахрий ёрлиғи ҳамда пул мукофоти билан тақдирланди.

Кўча ҳаракатларини тартибга солиш, бахтсиз ҳодисаларнинг олдини олиш бош вазифамиз. Шу вазифани адо этиш чоғида баъзан қутилмаган воқеалар ҳам бўлиб туради. Бир кун катта йўл назоратчиси, милиция лейтенанти Бахтиёр Тожибоев билан бирга хизматни ўташ пайтида қидирувда бўлган Равшан Абдиевни қўлга олди. Кейинчалик икки нафар оғуфрушни ҳам тумшугидан илтиридик. Тергов давомида улар олти кишидан иборат гиёҳвандлик моддалари сотувчи гуруҳ аъзолари эканлиги аниқланди.

Хуллас, ДАН ходими ўз вазифасида масъулиятни ҳис этган ҳолда ишласа, йўл-транспорт ҳаракати хавфсизлигини таъмин эта олса бахтсиз ҳодисага ўрин қолмайди.

С. ҚИЛИЧЕВА.
Суратда: ДАН бошлиғи Баҳодир Бобомуродов (ўртада) ёш ДАН ходими Анвар Раббимов ва ҳайдовчи Холбой Кенжаевлар билан суҳбатда.



лаб, айбдорларга нисбатан тегишли чоралар кўрдик.

21 мартдан 21 апрелгача “Ҳаракат хавфсизлиги”, 10

батан йўл-транспорт ҳодисалари камайди. Эришилаётган яхши натижалар туфайли ўз хизмат вазифасини сидқи-

ҚУШЛАРГА ЕМ БЎЛГАН... ЧАҚАЛОҚ

Онла ва жамият

Қорақалпоғистоннинг ёзи қанчалик жазирама бўлса киши шунчалик қаҳрли бўлади. Лекин болакайлар ёзининг иссиғига ҳам қишининг совуғига ҳам кўникиб кетганлар. Айниқса, гуппа-гуппа қор ёғиб, ҳаммаёқ паркуга ўралса, ариқ сувлари музлаб, йўллар яхмалакка айланса, уларга мазза – мактабдан келади-лару китоб-дафтарларини бир четга қўйганларича овқатланишга ҳам сабрлари чидамай, бир бурда нонни кўтариб, кўчага отиладилар.

Яхмалак қурилган тепаликнинг ҳов нарисидан жингилзор бошланган. Қий-чув билан ўйнаётган болалардан бирининг чанаси учқурроқ чиқиб қолди. У ҳар гал чана учиб, узоқроққа сирпанишга интиларкан, жингилзор четида чағ-чуғ билан ниманидир талашиб-тортишиб еяётган қаргалар безовта бўлиб ҳавога кўтарилар, лекин узоққа кетмай, буталарга кўнганича боланинг чопиб ортига қайтишини сабрсизлик билан кутардилар ва у сал нари кетгач, яна қайта ўлжаларига ёпирилардилар.

Зарб билан отилиб тушаётган чана рекорд натижага эришди – гизиллаганича нақ қаргалар ўлжа талашаётган жойдаги жингиллар орасига кириб кетди. Ва бола у ердан жон-жаҳди билан чинқириб, чанасини ҳам ташлаб қочиб чикди.

Болаларнинг ваҳимали қичкириқларига катталар йиғилдилар. Жингиллар орасида ўралган латталари ечилиб кетган, қўллари ва юзларини қушлар чўкиб еган чақалоқ ётарди...

Шуманай туман ички ишлар бўлими жиноят-қидирув бўлим-маси ходимлари зудлик билан суриштирув-қидирув ишларини бошлаб юбордилар. Гумон туғдирадиган ҳар бир ҳолат ўрганилди. Енгил ҳаётга интилувчи айрим қиз-жувонлар билан суҳбатлашилди. Лекин қизалоқ кимникилиги номаълум эди.

Гумон остида бўлган, лекин суҳбатлашилмаган бир қиз – Ойдин қолди. У 19 ёшда, турмуш қурмаган. Маълум бўлишича, қадам олиши чатоқроқ, ўйин-кулгига ишқибоз экан. Ойдинни уйидан топа олмадик. “Нукус бозорига кетган, – деди онаси Бибиғул – кечроқ келади”. Биз ундан ички ишлар идорасига ўтиб келишни сўрадик.

У ИИБга келганда биз стол устига бир неча хил матоларни, брезент бўлакларини тахлаб қўйгандик.

– Мабодо шуларнинг орасида сизга тааллуқлиси йўқми? – сўрадим Бибиғулдан.

Бибиғул матоларни бирмабир кўздан кечираркан: – Ие, манави дорпечининг бир бўлаги меники-ку? – деди ажабланиб.

– Бўлақлаб ювиб, қурисин деб

дарвоза олдида тортилган игпа ёйиб қўйсам, шу бўлаги йўқ. Етмагани учун қайтариб жойига илолмай ўтирибман. Вой тавба, манависи тандиримизнинг тепасига ёпиладиган брезентнинг бир қисми. Уни ҳам кимдир қирқиб олибди...

Кечга томон Ойдин бозордан қайтди. У билан тўғрилиқча олиб борган суҳбатимиз натижа бермади: ҳеч нарсадан хабарим йўқ, турмушга чиқмаган қиз бўлсам, қанақасига туғаман, деб оёқ тираб олди. Шундан кейин минг истиҳола билан нафақадаги кекса аёллар шифокорига мурожаат қилишга мажбур бўлдик. Чунки бу текширув қиз боланинг шаънига оғир ботишдан чўчирдик.

Шифокор Ойдин ўн кунча олдин кўз ёрганини, кўкраги сутта тўлаллигини айтса ҳам у ўз гапини маъқуллар “қиз боламан” дея бизни ишонтирмоқчи бўларди. Лекин далиллар қайсар бўлади...

– Уч йигит билан яқин алоқада эдим, бола қай бириданлигини билмайман, – охири тан олди Ойдин. – Шундай бўп қолди. Туққанимдан кейин биров билмасин деб уни битта гўштчопки билан уриб, ўлдирдим ва ўраб, ертўлада уч кун сақладим. Кейин ҳеч ким йўқлигида жингилзорга чиқариб ташладим...

– Қизим кейинги вақтларда жиззаки бўлиб галати семириб

юрганди, – дейди она. – Бир неча марта нега бунча кенг қўйлак қиясан, уйдан кўчага чиқмайсан десам, мен билан уришиб кетди. Гап буюқда экан-да...

Ҳа, гап буюқда экан. Лекин бир хонадонда яшаб, эрта-ю-кеч бирга бўлиб қандай онаки, қизининг ҳомиладорлигини, фарзанд кўрганини ва уни чопиб ўлдирганини билмайди? Хонадонидан бир парча латта йўқолганини дарҳол сезган, билган она қиздаги ўзгаришларни сезмаса, билмаса?

Шуниси қизиқки, Ойдиннинг ҳомиладорлигини онасигина эмас, бошқа яқинлари, дўгоналари, кўшнилари, ҳатто Ойдин тилга олган йигитлар ҳам “сезмаган, билмаган”. Бир-биримизга нисбатан бепарволик, оқибатсизлик шу даражага етибдики, бир бегуноҳ инсон дунёга келиб, ўша ондаёқ дунёга келтиргани томонидан ўлдирилиб, қушларга ем қилинганини ҳам “сезмай, билмай” қолибмиз... Бу эса аτροφимизга ҳушёрроқ кўз билан қарашга, айниқса, ота-оналарни, маҳалла аҳли, хотин-қизлар кенгашларини сал сезгирроқ, қизиқувчанроқ бўлишга ундайди...

А. МНЯЖОВ,
Шуманай тумани ИИБ бошлиғининг ўринбосари, милиция майори.

“Қорадорн – 99”

ОГОХ

Донишмандларнинг айтишларига қараганда, ҳавойи орзулар билан мақсадга эришиб бўлмайди. Инсон фақат ўзининг фидокорона меҳнати, касб-ҳунари орқасидан бой-бадавлат бўлиб кетиши мумкин. Мустақил юртимизда меҳнати, тадбиркорлиги билан топган беҳисоб бойликларга, агар ҳақиқий бўлса, ҳеч ким унга кўз олайтирмайди. Қонун уларни ҳимоя қилади.

Лекин Мартавали Нурматовга ўхшаган, осонгина мўмай пул, бойлик орттирмоқчи бўлганлар бўлса, ақлини йиғиб, дарров қадам босишини ўзгартирганлари маъқул, акс ҳолда уни чоғга, жаҳаннамга етаклайди. Қонунсиз хатти-ҳаракатларнинг ниҳояси – жавобгарликдир.

“Қахрамонимиз” – Мартавали Нурматов 1967 йилда Наманган вилояти Поп туманида туғилган. Кейинчалик Бувайда тумани Бештерак қишлоқ фуқаролар йиғинидаги Овул қишлоғида яшаган. У 1997 йилнинг кеч кузида мол боқиб юриб, тутқаторлари орасида пишиб етилган ёввойи наشا ўсимликларини кўриб қолади. Эртасига далада ҳеч ким йўқлигидан фойдаланиб наша барг ва уруғларидан бир литрлик шиша банка тўлгунча терган. Кейин оғуни ҳеч кимга сездирмай уйига олиб келиб томорқасининг бир четига кўмиб қўйган. Харидори топилса сотиб, манфаат кўришни мақсад қилган.

Орадан ярим йилча вақт ўтгач, Мартавалининг яшириб қўйган гиёҳига харидор топилди. Аниқроғи, Дангара туманидаги Санам қишлоғида 1965 йилда туғилган, илгари судланган Бахтиёр Абдуваҳобович Бўриев тусмоллаб, сўроқлаб келди.

– Бироз наша топсанг, пуллардик, – деди Бахтиёр эски таниши Мартавалига. – Ишончли харидор бор.

Мартавали анча-мунча пулли бўлиб қолишни ўйлаб, тезгина унга сирни ошкор қилди. 13 май кун Бахтиёр билан Мартавали ўзаро жиноий тил бириктириб, оғу савдосини амалга оширдилар. Битта банкадаги оғу 15 минг сўмга сотилди. Харидор И. Э. пулнинг 10 минг сўмини нақд санаб берди. Мартавали пулни олди-да, уйига яшириб, чорбоғдаги 1 литрлик банкадаги нашани олиб чиқиб унга берди. Учқовлон битта таксини кира қилиб, Қўқонга, савдо пулининг қолган қисmini олиб келиш учун кетишаётганда Саланг маҳалласида уларни милиция ходимлари тўхтатишди.

Суриштирувда шиша банкадаги нарса ходимларни сергаклантirdи. Унинг нима эканлигини аниқлаш мақсадида Қўқон шаҳар ички ишлар бўлимига олиб бордилар. Тиббий экспертиза бир литрлик шиша идишдаги нарса наша эканлиги тўғрисида хулоса берди.

Тергов-суриштирув ишлари Учқўприк тумани ички ишлар бўлими ходимлари томонидан ниҳоясига етказилди. Суд ҳукми билан Мартавали Нурматов билан Бахтиёр Бўриевлар маълум муддатга қамоқ жазосига ҳукм этилдилар. Мартавалининг оиласи ва 2 нафар вояга етмаган фарзанди, Бахтиёрнинг оиласи ва 4 нафар вояга етмаган фарзандлари орқаларидан кўз ёш тўкиб қолдилар.

Мана энди масаланинг яна бир асосий томонига ўтайлик. Қонунда наша, кўкнор ва бошқа турдаги психотроп ўсимликларни ёввойи ҳолда ўсишига йўл қўйгани, уларни эрта баҳорда ўсиб чиққан пайтида қолиб ташлаб, йўқ қилиб юбормаганликлари учун бригада бошлиқлари, бўлим, участка, хўжалик раҳбарларини жавобгарликка тортиш кўзда тутилган. Лекин айрим мутасадди раҳбарлар бу жиддий масалага эътиборсизлик билан қарамоқдалар. Натижада бошни айлантирувчи, саломатликка ёмон таъсир қилувчи наркотик гиёҳлардан ёмон экинлар (бугдой, пиёз, сабзи, турли хилдаги кўкатлар) орасида ўсадими, қатъи назар, зудлик билан йўқ қилиб ташлаш чораларини кўришлари керак. Туманларнинг раҳбарлари, маъмурий органларнинг бошлиқлари бунга ўз назоратларига олишлари зарур. Шундагина биз, Мартавали, Бахтиёрга ўхшаб, таққиланган нарсани сотиш билан пул топиш васвасида юрган ёшларни жиноят жарликларидан сақлаб қолган бўламиз.

Баҳромжон МАЗОКИРОВ,
Учқўприк тумани ИИБ бошлиғи, милиция подполковниги.
Тўхтасин МИРЗАРАҲМАТОВ,
журналист.

“ЎЛТИМ КЕЛМАГАНДИ ЎШАНДА...”

ёки безовта қушча ноалари

...Икки дунё ораси бир қадам, деганлари рост экан. Ҳаммаси кўз очиб юмгунча ҳал бўлди. Нима бўлганини тушуниб етмасдан туриб, юрагим уришдан тўхтади. Лекин ана шу бир сониялик вақт менинг учун йилга татиғулди бўлди. Ажал кипригимга осилиб қолганлигига ақлим етгач, жуда кўп нарсалар шууримдан ўтди. Ҳаттоки вужудимдаги оғриқ ҳам сезилмай қолди. Биринчи галда фалокатдан ҳабар топгач, сочини юлиб фарёд чекадиган онажоним, кейин бошқа меҳрибонларим сиймоси бир-бир кўз ўнгимда гавдаланди.

Аваллари ёлғиз қолган пайтларимда ўлим барҳақлиги ҳақида мулоҳаза қилганларим рост, аммо ажал отли меҳмон имлаб чақираётганда, тўғриси, ўлгим келмади. Ахир тириклик сувиға, ёруғ олам лаззатларига қонмагандим-да!

Бир пайтлар эртароқ умри ҳазон бўлганлар ҳақида гап кетганда, “Ўлган ўлди-кетди, ортида қолганларга қийин бўлди”, – деган гаплар кўнрагимга чалинган. Ростдан ҳам шундаймикин, деб кўя қолгандим. Бошимдан ўтиб, энди ҳис қиларман: ўлганларга ҳам осон эмас экан.

Жоним узилиши билан руҳим қушчага айландию вужудимни тарк этиб учиб чиқди. Ўшандан бери безовта, чунки унинг миттигина жисмига беором қалбим жойланган.

Фалокат юз берган пайтда йўл четида тургандим. Узоқдан чироқларини ёкиб келаётган машина бутунлай йўл чеккасида чиқиб кетиб, мени уриб юборишини туш кўрибманми!

Нима бўлганини идрокимга сигдиролмай, кесилган теракдай гурсиллаб йиқилдим. Дастлаб кўз ўнгим ярақлаб кетгандай бўлди, кейин эса бутун борлиқни зулмат қоплади. Бора-бора, боя айтганимдай, қушчага айландию самога кўтарилдим, бўлаётган воқеаларни тепадан туриб аниқ-равшан кузата бошладим.

Бир пайт ДАН ходимлари етиб келишди. Улардан бири менга ажал олиб келган “ВАЗ-2109” русумли, Г

25 64 СИ давлат рақам белгилли автомашина ҳайдовчисини чеккароққа чақириб, савол-жавоб қила кетди:

– Исмнингиз нима?
– Ўткир.

“1999 йил 18 июнь куни кечаси тахминан соат бирларда 1974 йилда туғилган Раёно Маҳмадова Шароф Рашидов тумани ҳудудида – аниқроғи, Янги Бетон – Пахтабод йўлининг 2-километрида автофалокат оқибатида ҳалок бўлди...”
(Тезкор маълумотномадан)

– Нима учун фирт маст ҳолда рулга ўтирдиз?

– Энди...
– Қаерликсиз?
– Косон шахридан.
– Машина кимники?
– Қариндошим Комил Шодиевники.

– Ишонч қоғози ва ҳайдовчилик гувоҳномангизни беринг!

– Менда йўқ улар...

Ана шундан кейин улар яна бир талай қоғозларни тўлдиришди, автофалокат рўй берган ҳолатни чизишди, машинани кўздан кечиришди.

Бу орада менинг қонга беланган жасадимни “тез ёрдам” машинасига солиб олиб кетишди.

Бу ерда қиладиган иш қолмагач, уйимга томон учдим. Дарвозадан ҳар доимгидек оҳиста юриб эмас, учиб кирдим. Бир зумда ҳовлимизга одам дегани сиғмай кетибди. Дод-фарёд авжида. Деворга суяним қолган онажонимни зўрга танидим: кун ўтмай қадди эгилиб, сочлари оқариб қолгандек туюлди менга.

Сочларини силагим, кўз ёшларини артиб кўйгим келди. Лекин илож қанча – айна пайтда аввалги Раёно эмас, унинг руҳи – кўзга кўринмас

қушча эканлигим ёдимга тушди, изтироб билан оҳ чекдим, холос.

Ини бузилган чумчуқдек чиркиллаб Дўстлик туманига – Комил Шодиевнинг уйига етиб бордим. Бу оилада ҳам дилхунлик ҳукмрон. Аммо бу дилхун-

бўлиши учун ич!” – деб зўрлаганлар тепасида чарх ура бошладим. Ҳайхотки, бу ерда уларни тушқунликка туширган нарса менинг ўлим эмас, балки Ўткир Нормуродовга берилажак жазо экан! Менинг жисмим тупроққа жо бўлганлиги,



ликнинг боиси нима эканлигига барибир ақлим етмади. Комил Шодиевнинг ғамнок юзларига бирор маъно ахтариб узоқ термудим, аммо унинг дилини хуфтон айлаган ҳис транспорт рулини бошқаришга мутлақо номуносиб, ҳайдовчилик гувоҳномаси бўлмаган, устига устак маст одамга машинасини бериб қўйиб, бир аёлнинг умрига зомин бўлганлиги учун пушаймонликми ёки қонун олдидаги жавобгарлик талвасасими билолмадим.

Кейин... фалокатдан олдинроқ Ўткир билан бир дастурхон атрофида ўтириб, бирга қадах кўтариб, шакарғуторлик қилган, ўтириш охираб қолганда уни “Йўлинг бехатар

ота-онам бағрида фироқ ўти аланга олганлиги билан ҳеч кимнинг иши йўқ. Ўткирнинг бир неча йилга қамалиб кетиши мумкинлиги асосий мавзу экан.

Алҳазар!

Ўткир-ку, жони омон бўлса, бир кунмас-бир кун жазосини ўтаб чиқар. Аммо мен-чи? Иккинчи бор бу ёруғ олам юзини кўрмайман-ку? Ота-онам-чи? Кўча-қўйда тенгқур дугоналаримга дуч келганларида битмаган яралари тирқалиб, бўғиздан отилиб чиқаётган соғинч ва аламини қайта ютишга мадор топиша олармиклар? Қани инсофу, қани диёнат?

Ва, ниҳоят, уларнинг ичида ақл-

лироғи “ортиқча” гап-сўзларга нукта қўйди:

– Бўлди, дийдиёни бас қилинлар, қўйни ҳам, эчкини ҳам ўз оёғидан осийади, ҳеч ким унинг оғзига ароқни зўрлаб қўймаган!

Агар қушча шаклидаги руҳ эмас, тирик инсон бўлганимда, бу гапни эшитиб ёқа ушлашим тайин эди.

Қаранг-а, тириклар орасидаги муносабатнинг усти ялтироғу ичи қалтироқлигини, носамимийлигини! Бир тасаввур қилиб кўринг-а, мен бегона эмас, уларнинг қизлари ёки сингиллари бўлганимда, қандай аҳволга тушишарди!

Бугун Ўткир Нормуродовнинг боши ҳам: темир панжаралар ортида ўтирибди.

Энди, азиз юртдошим, навбатдаги саволларим Сизга аталган.

Ўткир Нормуродов ва унинг атрофидагилар хатти-ҳаракатидан ҳеч бўлмаса Сизнинг қалбингиз ларзага келдими? Бундан кейин бурнидан нарини кўрмайдиган, ўз қобиғига ўралиб олган, дунёни сув босса ўрдакка не ғам, қабилдаги кишиларни ҳеч бўлмаганда турткилаб туришга, мавжуд тартиб-қоидаларни писанд қилмайдиганларга дашном беришга ва шу тариқа авто-транспортлар билан тирбанд кўчаларда ўзгалар хавфсизлигини таъминлашга заррача бўлсада ҳисса қўша оласизми?

Қамоли ишонч билан “Ҳа!” десангиз – хўп-хўп, акс ҳолда бошингиз узра чарх уриб, бир гапни такрорлайверман: менинг ва тақдири меникига ўхшаганларнинг ҳалокатида Сиз ҳам айбдорсиз!

Безовта қушча ноаларини оққа кўчирувчи:
Раҳмонали ҚОСИМОВ,
ИИБ ДАН Бош бошқармаси катта инспектори, милиция майори.

ҚАЛОВИНИ ТОПСАНГ ҚОР ЁНАР

ёхуд хизмат ваколатидан ўз нафси йўлида фойдаланмоқчи бўлганлар ҳақида

Ўзбекистон Республикаси божхона постларидан ҳар куни минглаб машиналар ўтади. Автотранспортларни, юкларни, товарларни, ҳужжатларни ва фуқароларни кўриқдан ўтказиш, юкларга ва товарларга тўлдириладиган декларациялар тўғри тузилганлигини назорат қилиш божхона хизмати ходимлари вазифасида.

Абдушукур (исмлар ўзгартирилган) Навоий божхона постида хизмат қилаётганига кўп вақт бўлмаса-да, тез орада “тижоратчи” опаларнинг ишонган укаларига айланиб қолди. Алматы шахридан келган “Икарус” русумли автобуслардаги юк эгаларининг вакили сифатида ўзларини Гулнора ва Моҳира деб таништирган аёллар билан ўзаро тил бириктириб, автобусдаги юкларнинг бир қисмига божхона декларацияларини ёзиш, кўп қисмини эса Ўзбекистон Республикаси ҳудудида декларациядан ўтказмай олиб кириш ҳақида келишиб оладилар. Шундан сўнг Гулнора юк эгаларига билдирмаган ҳолда, ўйлаб топилган шахслар номига 6 дона қалбаки декларацияни тўлдирди, жами 880.200 сўмлик

юкларни декларацияда кўрсатмай, тегишли акциз солиғини тўламасдан К. Абдушукур роилиги билан Ўзбекистон Республикаси ҳудудида божхона назоратини четлаб, ноқонуний равишда олиб ўтади. Навбатдаги автобусдаги юкларнинг вакили Моҳира эса 291 дона телевизор, жами нархи 2.000.328 сўмни ташкил этувчи юк учун ўйлаб топилган шахслар номига бор-йўғи саккиз дона декларация тўлдириб, 201.600 сўмгина пулни божхона кассасига тўлайди. Абдушукур қўл ураётган иши қонунга зид бўлса-да, смена бошлиғига декларацияда кўрсатилган юклар тўғри эканлиги ҳақида ёлғон маълумот беради. Йўлда ҳар икки “Икарус” автобуси ДАН ходимлари томонидан тўхта-тилиб, Коррупция, рақет ва терроризмга қарши кураш ходимлари республика ҳудудида олиб ўтиладиган товарлардан 980.830 сўм давлат солиғи ундирилмай қолганлигини ва хизмат ваколатини суиистеъмол қилган бир кимсанинг ва ҳар турли найранглар билан ноқонуний равишда белгиланган давлат солиқларини тўлашдан бўйин

товловчи “тижоратчи”ларнинг қилмишларини фош этдилар.

– Кейинги пайтларда республикамиз ҳудудида товарларни акциз тўловларини тўламасдан, ҳар турли найранглар билан олиб ўтаётган, ўз хизмат ваколатларини суиистеъмол қилиб, ноқонуний равишда товар-моддий бойликларимизни четга олиб чиқиб кетилишида ва республикамиз ҳудудида айланма йўллар орқали четдан товар-моддий бойликларни олиб киришда яқиндан кўмаклашаётганларнинг сони ортиб бораётганлиги кишини ўйга толдиради, – дейди биз билан суҳбатда Тошкент вилояти ИИБ КР ва ТҚКБ бошлиғининг биринчи муовини, милиция подполковниги У. Ханжаров. – Аммо шунга қарамасдан ходимларимиз томонидан вилоят ҳудудида тадбиркорликни коррупция ва товланчиликдан ҳимоя қилиш бўйича қатор тезкор тадбирлар амалга оширилмоқда. Ана шундай тадбирлар натижасини иқтисодий йўналишда 986 та жиноят аниқланган бўлиб, 472 та жиноий иш қўзғатилди. Содир этилган жиноятлар оқибатида қўрилган зарар 113

млн. 786 минг сўмни ташкил қилган бўлса, қўрилган чоратадбирлар натижасида зарарни қоплаш учун айбдорлардан 104 млн. 340 минг сўм ундирилди, етказилган зарарнинг 91,2 фоизи қопланди. Айниқса, давлатимизнинг асосий бойлиги бўлган ҳосилдор ерлардан хўжасизларча фойдаланиш ва унинг тақсимланиши вақтида амалдор шахслар томонидан порахўрлик, ўз мансабини суиистеъмол қилиш ҳамда талон-торожлик ҳолатлари кўпайиб бормоқда. Ўтказилган тадбирлар натижасида Янгийўл туманидаги Навоий номли жамоа хўжалиги бошқарув раиси Ҳайтов Абдупаттоҳ деҳқончилик қилиши учун 2 гектар ер сўраб келган фуқаро Й. Юсуповдан 75.000 сўм пора олганида қўлга олинди ва жиноий жавобгарликка тортилди.

Ўртачирчиқ тумани Гулистон жамоа хўжалиги бошқарув раҳбарияти ўз мансабини суиистеъмол қилиб, хўжаликка 4 млн. 120 минг сўм моддий зарар етказганликларини учун жиноий иш қўзғатилди. Куни кеча фуқаро Туропов Чирчиқ шаҳар ИИБ КР ва ТҚКБ ходимларига мурожаат қилиб, тўрт дона қалбаки 50

АҚШ долларли купюраларни топширди. Ушбу ҳолат юзасидан тезкор-тергов гуруҳи тузилиб, ходимларимизнинг саёй-ҳаракатлари билан Исроил давлати фуқароси К. А. ушланди, унга тегишли автоулов салонидан қирқ дона қалбаки 50 АҚШ доллари олинди. Янгийўл шахрида эса яна бир товланчилик йўли этилди. Ҳеч қаерда ишламайдиган С. Ғайрат ва Т. Абдуғанилар товланчилик йўли билан “Бахт уйи” мудирасидан 6900 сўм ва қирқ тўққиз АҚШ долларини талаб қилиб олаётганда КР ва ТҚКБ бўлим бошлиғи Ш. Тўхтаев ва тезкор ходимлар томонидан ушланди.

Дарҳақиқат, ойна этак билан ёпиб бўлмагани сингари, ҳеч бир жиноят жазосиз қолмайди. Иқтисодий-иқтисодий ривожланишига тўсқинлик қилаётган, баднафслик оқибатида инсоф, диёнатини йўқотган ҳар бир ҳуқуқбузар қонун олдида жавоб беради. КР ва ТҚКБ ходимлари эса жамиятимизга ёт бўлган иллатларга қарши курашаверади.

М. СУЛТОНОВА,
Тошкент вилояти ИИБ матбуот маркази ходими, ички хизмат лейтенанти.

БЕДАРАК ЙЎҚОЛГАН



Андижон вилояти Балликчи тумани ИИБ томонидан шу тумандаги М. Улугбек номли жамоа хўжалигида яшовчи **Жўрабоева Малоҳат Исроиловна** қидирилмоқда. У 1978 йилда туғилган, 1998 йил 28 март куни соат 10.30 ларда Зухраҳон исми сингисига “Мен дадамни излаб Тошкентга кетаяпман” деб чиқиб кетиб, бедарак йўқолган.

Белгилари: бўйи 160–165 см, юзи оқ сарикдан келган, сочи сарғиш калта қилиб қирқилган, кўзи қисқикроқ.

Кийимлари: бошида оқ рангли араб рўмоли, эгнитда қора жемпери, пушти рангли кўйлаг, оёғида оқ туфли бўлган.

М. Жўрабоевани кўрган ёки қаердалигини билган фуқаролардан яқин орадаги милиция бўлимига хабар беришларини сўраймиз.

Инсон умрининг шундай дақиқалари бўладики унда, унинг барча ташвишлари қувонч ва шодликлар баҳоланади. Кўнгилда армон бўлиб қолган орзулар ёдга олинади. Югуриб-елиб нима орттирганинг, нималарни йўқотганинг аён кўринади. Ана шу дақиқада одам ё алам билан бир оҳ уради, ё фахр билан шукроналар айтади.

ҲАМОН САФИМИЗДА

Ҳаётининг 80 баҳорини қаршилаган Уринбой ота Абдукаримов билан унинг таваллуд кунини арафасида учрашдик. Ҳар доимгидек чехрасида ним табассум, кўзларида сокин бир ёрқинлик, руҳида тетиклик, бардамлик мурасам. Гап орасида узоқ яшашнинг фазилатларига урғу бердик. Тиниқ зеҳн, ўткир фаҳм билан мақсадиимизни дарров англади. Гапни нимадан бошлашни ўйлади шекилли, кейин:

— Тақдир, қисмат, омад деган сўзлар бор, — деди у вазминлик билан. — Мен бир нарсани билман, юрагинг тоза бўлса эл адаштирамайди. Ақлингга иш буюриб, кўнглингни меҳнатга қаттиқ боғласанг ҳаётда ўрнинг маълум, мартабанг ниятингга лойиқ бўлади. Ҳаммасидан ҳам киши ўз баҳосини, имкониятини билиши, иззат нафсини қадрлай олиши керак.

— Ҳаётда бирор марта кимдандир кўнглингиз, оғриганими? — Ана холос. Наҳот сиз мени

шу умримда бирор нодонга дуч келмаган деб ўйласангиз, — деди у қулиб. — Нодонлар кўп бўлди. Лекин бунинг бир қочирими бор. Нодонга жahl қилиб бўлмайди. Жahl қилсанг ундан тубанлашиб кетасан. Жаҳлингни ютишга тўғри келади, гоҳи чекинасан... Милиция ходими сабр-тоқатли бўлиши керак, деган ҳақиқатнинг маъноси ҳам шунда. Бизларни ёмон кўради-ганлар ҳам оз эмас. Мен жиноятчиға нафрат кўзи билан қараган эмасман. Ҳаётда адашган, бирор сабаб билан ёмон йўлга кириб қолган одам деб муомала қилганман. Ана унда жиноятнинг туб илдизига етиш уни келтириб чиқарган сабабларини аниқлаш ва охир-оқибатда тўғри хулоса чиқариш мумкин. Чунки ҳаётда бировнинг қўли билан ўт қовлайдиганлар ҳам йўқ эмасда.

Уринбой армия сафига қақирилганда йигирма ёшда эди. Унинг аскарлик хизмати урушга уланиб кетди. Дахшатли жанг-

ларнинг хавф-хатарлари, азоб-уқубатларида тобланган Уринбой Абдукаримов 1946 йилда Она Юртига қайтиб келди ва ҳуқуқ-тартибот идораларида хизмат қилишга бел боғлади. Тошкент шаҳридаги областлараро милиция мактабида ўқиди. Ўқишни битказиб Ўзбекистон Ички ишлар вазирлиги Хоразм вилоят бошқармаси бандитизмга қарши кураш бўлинимаси тезкор вакили сифатида ишлай бошлади. Умрининг асосий қисмини, бутун меҳнат фаолиятини милиция хизматиға бағишлаган Уринбой ота Абдукаримов кўпларга устозлик қилди. Мана бир неча йилдан буён вилоят ИИБ фахрийлар кенгашининг раиси. Барча ташкилий-оммавий тадбирларда фаол иштирок қилади. Кўп йиллик хизматлари учун бир неча марта мукофотланди.

У фарзандларини даврга муносиб қилиб вояга етказди. Фарзандларидан бири унинг касбини давом эттиряпти. Ўзининг 80 ёшини қутиб олаётган отахоннинг сермазмун ҳаёти барчага ибратлидир. Халқнинг хизмат ва эъзозига сазовор бўлган Уринбой ота Абдукаримовнинг умр саодати дилларга қувонч бағишлайди.

Муҳиддин
НАВРЎЗАЛИЕВ.

КАСБИДАН КАМОЛ ТОПИБ

"Инсон ўз умрини фойдали ва мазмунли ўтказмоқчи бўлса, у ҳар бир ўтган кунига баҳо бериши, йўл қўйган камчиликларидан хулоса чиқариши, вақтинги қадрига етиши керак. Шундагина у одамлар қалбидан жой топа олади, меҳр-муҳаббат қозонади, обрў топади. Вақти-вақти билан орта назар ташлаб туриш инсонни кибру ҳаводан, манманликдан, хотирасизликдан сақлаб туради".

Бу фикрлар участка вакили, милиция капитани Отаназар Сапаровга тегишли. Инсонийликнинг барча олижаноб хислатлари унда муҳасаммидир. У салкам йигирма йилдан буён милиция ходими деган шарафли номга

лойиқ хизмат қилмоқда. Биз унинг қилган ишларини санаб ўтирмоқчи эмасмиз. Камтарлиги боис, буни ўзи ҳам ёқтирмайди. У қатъиятли, берилган топшириқни ўз вақтида бажаришга ҳаракат қилади, туманнинг қайси ҳудудига юборилмасин, одамлар билан тез тил топишиб кетади.

Отаназар жиноятчиликнинг олдини олишда жамоатчилик маддаига таянади. Хўшчақчақ, очик-кўнгил бу инсоннинг жамоада ҳурмати баланд. Оиласидан кўнгли тўқ йигитнинг иши ҳам унумли бўлади деганларидек, Отаназар бахтли оила соҳиби ҳамдир. Милициянинг машаққатли меҳнатини яхши тушунган

Орзиғул турмуш ўртоғига елкадош бўлиб келмоқда. Фарзандлари Юлдуз ва Ёркинжонларнинг ҳам ўзларидек комил инсон бўлиб етишишлари учун астойдил ҳаракат қилмоқдалар. Қисқа қилиб айтганда, Отаназар фидойилиги, ҳалоллиги билан касбидан камол топаётган комил инсондир. Биз ҳамкасбимиз Отаназар Сапаровни тутилган кунига 40 йил тўлиши муносабати билан самимий табриклаймиз. Юрт тинчлиги ва оқсоқиллигини таъминлашдек эзгу ишларида омад ёр, Аллоҳ мададкор бўлсин.

Тўрткўл туман ИИБ
раҳбарияти
ва шахсий таркиби.

"Малиш"нинг асли исми шарифи бошқа, у ўзбек боласи, ёши 20 да, тўғриси у ёмон йигит эмас, ёмон иш қилишни кўнглига ҳам келтирмаган, фақат вазият уни жиноятчилар гуруҳига киритиб қўйди ва охир-оқибатда у оғир жиноятни содир этишда қандай қатнашганини сезмай қолди.

Оилада учинчи фарзанд бўлган "Малиш"нинг икки акаси ва икки укаси бор. Аранг 6-синфни битириб олган 20 ёшли бу йигитга "Малиш" лақабини Самарага боришганда қўйишган.

"Малиш" ҳаракатчан қишлоқ боласи, у ўз меҳнати билан кун кечирини ёқтиради ва шу мақсадда пул топиш учун Тошкентнинг Отчопар бозорига бориб, ўша ердан аравача олиб, тўрт ойча ишлаб юрди. Анча-мунча пул ҳам ишлаб олди, лекин куз келиб жой масаласи ва бошқа сабаблар туфайли қишлоғига қайтишга мажбур бўлди. Кўп ўтмай уни амал-қисси қамаиб қолди.

— Самарага қайтиб келмайсанми? Танишларимга ҳаммол зарур экан, яхши ҳақ тўлашади, — деб қолди у.

Самарага тўрт киши бўлиб поездда боришди, йўл ҳаражатларини албатта буюртмачининг ўзи кўтарди. Самарада уларни кўнглик ҳамюртларидан "Шурик" лақабли йигит яхши қарши олди ва уларга бошпана берди, аммо бир ҳафтадан ортиқ вақт ўтса ҳам ишдан дарак бўлмади. Шунда "Малиш" уйга қайтишга рухсат сўради, бахтига буюртмачи қаршилиқ қилмади, аксинча, уйга қайтишга чипта олиб берди, яна қўлга икки минг сўм пул ҳам тутқазди. "Малиш" бу пул билан уйларига эсон-омон етиб келди.

Аввалига мол бозорига ишлаб юрди ва кунлардан бир кун у Самарага бирга борган акахонларидан Маъруфниқига отланди, сабаби:

"Уйга боргач бизниқига ўтиб қўйин" деганди. Маъруф унга қосибчиликни ўргатиб қўйишни ҳам ваъда қилганди. "Яхшиямас, — ўйлади "Малиш", — ахир у одам менга ишонганди, мен бўлсам ўз юмушларим билан бўлиб кетдим. Бугун албатта акахонимнинг уйидан хабар олиб келаман".

...Эшикни акахонининг ўзи очди:

"МАЛИШ"НИНГ САРТУЗАШТЛАРИ

— Жуда вақтида келдинг, қани кир, — дея уни кўярда-қўймай ичкарига бошлади акахони.

Уйда Самарага олиб борган буюртмачидан ташқари ҳамма бор эди, ҳатто уларга ўша ерда бошпана берган "Шурик" ҳам. Ҳаммалари уни кўриб хурсанд бўлишди, кадрдонлардек кўришишди, ҳазил-мutoйиба бўлди.

— Мана, бугун юк бор, шуни бирга юклаймиз, сен ҳам бирга борасан, — дейишди. Кўп ўтмай икки танишлари чиқиб кетди.

— Қосибчиликни ўргатиб қўясизми, акахон? — деди "Малиш" мезбонга.

— Албатта ўргатиб қўяман, аммо менга айт-чи, нега эртароқ бизниқига келиб хотинимга хабар бермадинг?

— деб сўраб қолди мезбон.

— Ҳа, ака энди, кечирасиз, ишга берилиб қолибман. Бу ёғига қандай хизмат бўлса, кўнглингиздагидек қилиб бажараман, — деди у.

— Шундай бўлиши керак. Бугун "доривор" бор, шуни юклаймиз, — деди мезбон.

Аммо юкка бориш уч кунга қўзилиб кетди, бу орада "Малиш" акахониникида меҳмонда юраверди.

Фақат учинчи кун соат 22лар чамаси мезбон уйга келиб "Малиш"га пастга тушиб машинага ўтиришни буюрди. "ГАЗ-24" русумли машина-

да унга таниш кимсалар ўтирарди. Ҳеч нарсадан хавфсирмаган "Малиш" машинага ўтирди.

Машина оралик йўллардан юриб канал бўйига чиқиб олди. Кейин кўприқдан ўтиб тўхтади ва тўртовлон машинадан тушди. Ҳайдовчи машинада қолди. 200-300 метр юрилгандан сўнг йўлнинг ўнг томонидаги темир дарвозали уй олдида тўхташди.

— Сен дарвоза олдида турасан, — деди Маъруф "Малиш"га.

Шу пайт ҳовлидаги иккинчи уйнинг чироғи ёнди ва гўдак йиғиси эшитилди. "Малиш" ҳали босқинчилик жиноятига шерик бўлиб келганини англаб етмасидан туриб Маъруф, Иззат ва "Шурик"лар чироғи ёнган уйнинг эшигини тепиб ичкарига ки-

риб кетишди. Улар уйга кириш олдида юзларига ниқоб кийганини кўриб, "Малиш" қандай ишга аралашиб қолганини сезди ва жуфтакни ростлагани шайланди. Ичкаридан аёл ва эркакнинг дод-войи эшитила бошлади. "Малиш" шофёрнинг олди-га боришга отланганида Маъруф унинг олдини тўсди.

— Мана бунинг олиб юзингни тўсиб боғла, фақат кўзинг очик бўлса бас, — дея оқ қийқ берди. Кейин қўлига бир метрлар чамаси темирни тутқазди ва — қани, орқамдан юр, — деди.

Охирги уйнинг олдида олиб бориб: "Шу ерда қимирламай турасан", — деб тайинлаб ўзи ичкарига кириб кетди. Кўркувдан "Малиш" дағ-дағ титтарди, у фурсатдан фойдаланиб қочиш пайига тушиб турганди, яна Маъруф чиқиб уни сўкиб: "Жойингга бориб тур", — дея қайтарди. Озроқ вақт ўтгач "Шурик" чиқиб келди ва уни уйнинг ичига киришини тайинлади.

Ичкарида уй эгаси қўли орқага боғланган ҳолда ерга қараб ётарди, устига ёстиқ қўйилган. Ёнида эса аёл киши бешигини қўлтиқлаб ўтирарди. Маъруфнинг қўлида милтиқ. Уй эгаси хотинига: "Кириб аямга айт, пулнинг ҳаммасини берсин", — деди. Иззат ва Маъруф хотин билан бирга чиқибди. "Малиш"га эса худди мил-

Умрни оқар дарё дейдилар... Бу балки инсон ўз ҳаётининг энг завқли унутилмас дамлари орада қайтара олмаслиги боис ҳам айтилган қиёсий бир ўхшатиш бўлса керак. Ёки бу гапнинг тагида, ҳой инсон кўзингни оч, умринг дарё каби оқиб ўтиб кетади, уни беҳуда ўтказма, деган пурмаъно ётса ажаб эмас.

лий ишлар ҳақидаги фикрини билмоқчи бўлам:

— Республика ИИБ тизимларида ташкилий ишлар борасидаги бир қатор синов ишлари олиб борилаётганлигини эшитиб жуда хурсанд бўлдим. Чунки биз ҳозиргача қизил империя

очилишини ташкил этиш мақсадида ҳар бир шаҳар, туман ички ишлар бўлимларида ташкилий назорат гуруҳларини ташкил этиш лозим.

Мен ундан бугунги кунда ички ишлар тизимидаги хизмат интизомини янада яхшилаш мақсадида амалга ошириш зарур бўлган долзарб масалалар тўғрисида сўрайман:

— Ички ишлар тизимида хизматни яхшилашнинг бирдан-бир йўли бу соҳага малакали ходимларни ишга қабул қилишдир. Республикада истиқлол туфайли, ҳуқуқий демократик давлат бар-

УМР МАЗМУНИ

давридан мерос қолган иш юритиш услубидан халос бўлолмаяпмиз. Жиноятчиликни кескин камайтириш, унинг олдини олишда бундай ўзгаришлар жуда зарур деб ўйлайман. Участка инспекторлари билан ВЕИН инспекцияси штатини бирлаштириш, бунинг ҳисоби-га участка нозирга назорат учун ажратилган худуд майдонини камайтириш лозим.

Шунингдек, бошқарув аппаратидаги бир қатор хизматларни, масалан ЖКБ хизмати штатларини қисқартириш эъзига шаҳар ва туман ИИБдаги шу соҳа мутассадиларини қўшимча куч билан таъминлашга эришган бўламиз ҳамда бошқарма ходимларини жойларга хизмат сафарига юбориш билан боғлиқ бўлган муаммолар ҳам барҳам топади. Содир этилган жиноятларни таҳлил этиб бориш ва

по этиш йўлида жуда кўп ишлар амалга оширляпти. Шу ишлар қаторида жойларда милиция ўрта махсус мактабларини қайта ташкил этиш керак. Бугунги кунда вилоят милициясининг бор йўғи 30 фойзни ҳуқуқий бўлимга эга ходимлар ташкил этишининг ўзиёқ, бизда кадрлар танқислигининг ёрқин исботидир.

Ҳа, эллик ёшни баъзилар инсон умрининг ўртаси деб ҳам ҳисоблайдилар. Ҳар бир кишики айна шу ёшга қадар ўз умрининг, ҳаётининг мазмунини билмас экан, у қолган умри давомида ҳам бунинг англамай ўтаверади. Самижон Чориев ўз умр мазмунини аллақачон англаб етган инсон. Халқ учун, эл-юрт манфаати йўлида кечаю кундуз тинимсиз хизмат қилиш — унинг умри мазмунлидир.

С. АБДУВОҲИДОВ.

тиқ тирагандек қилиб темирни уй эгасининг орқасига тираб туришни буюришди. Шу пайт бу дунё ғанимликларидан беҳабар норасида йиғлаб қолди.

"Малиш"нинг раҳми келиб унинг бешигини тебрата бошлади. Бу қанчага қўзилгани аниқ эмас, аммо "Шурик" қайтиб кириб "Малиш"ни имлаб қақирди.

"Малиш" бошқа хонага чиқишга топшириқ олди, у хонага кирмасдан қочишни режалаштирди, лекин уддасидан чиқа олмади. Қўшни хонада у кўркувдан адоий тамом бўлган кампирга пойлоқчилик қилди. Юзларига ниқоб тортиб олган босқинчилар эса бошқа хонага ўтишди. "Малиш" табиий зарурат учун кампирга тоғора олиб келиб берди, ичгани сув тутди:

— Кўркманг, бунга ҳеч нарса қўшилгани йўқ, — деди у зорланиб боққан кампирга.

Керакли ўлжани олган қашқирлар "Малиш"ни қақирди. Қўлга киритилган ўлжа — 130 минг сўм пул Маъруфнинг уйида бўлинди. Унинг 30 минг сўми "Малиш"га тегиш. Лекин "Малиш" пулни шу кунларда зориққан ота-онасига ҳам бермади, фақат дадаси унда пул борлигини сезиб қолиб сўраганда 6 минг сўмининг газ олишга берди. Қолган пулларни еб-ичишга сарфлаб юборди. Ичини ит таталаб дардини бировга айта олмай юрганди, милиция ходимлари уни тутиб келишди. Бошқалар ҳам қўлга олинди.

Ж. ХОЛМАТОВ,
Ўзбекистон туман ИИБ
тергов бўлинимаси бошлиғи,
милиция подполковниги.
М. КИМСАНБОЕВ,
журналист.

ШАБРИКЛАЙМИЗ!

Тошкент Олий ҳарбий-техника билим юрти бошлиғи генерал-майор Ш. Н. НИЯЗОВга!

Ҳурматли Шухрат Ниязович!

Сизни кутлуг 50 ёшингиз муносабати билан самимий муборакбод этамиз! Сизга узоқ умр, сиҳат-саломатлик, келгуси ишларингизда омад ва муваффақиятлар тилаб қоламиз.

ИИБ раҳбарияти ва шахсий таркиби.

Ўзбекистон Республикаси ИИБ ЖТСБ бошлиғи ўринбосари милиция полковниги **Виктор Евгеньевич ОСИПОВ**ни таваллуд кунларига 50 йил тўлиши муносабати билан самимий табриклаймиз ва узоқ умр, саломатлик, масъулиятли ишларида омад ва зафарлар тилаб қоламиз.

ИИБ ЖТСБ раҳбарияти ва шахсий таркиби.

Тошкент вилояти ИИБ Тиббиёт бўлими поликлиникаси бошлиғи ўринбосари **Ижобат Дониоровна АБДАЗИМОВА**ни муборак юбилей ёшлари билан чин қалбдан табриклаймиз. У кишига узоқ умр, соғлиқ-саломатлик, ишларида муваффақиятлар тилаймиз.

Тошкент вилояти ИИБ раҳбарияти ва шахсий таркиби.

Тошкент шаҳар Ҳамза тумани ИИБ бошлиғи ўринбосари милиция майори **Иномжон Тўйчиевич ЭРГАШЕВ**ни 40 ёшга тўлганлиги муносабати билан унга узоқ умр, сиҳат-саломатлик, бахт-саодат, келгуси ишларида муваффақиятлар тилаб қоламиз.

Ҳамза тумани ИИБ раҳбарияти ва шахсий таркиби.

Акмал Икромов тумани ИИБ ҳузуридаги қўриқлаш бўлими раҳбарияти ва шахсий таркиби сардор **Олимжон Тўраев**ни таваллуд кунин билан самимий кутлаб, узоқ умр, соғлиқ, хизматларида улкан зафарлар тилаб қоладилар.

Тошкент тумани ИИБ ходими милиция старшинаси, азиз адажонимиз **Бахтиёр КАРИМОВ**ни туғилган кунлари билан самимий табриклаймиз. Узоқ умр, сиҳат-саломатлик, ишларида катта ютуқлар тилаймиз.

Рафикаси Вазира, фарзандлари Улугбек, Нилуфар, Дониёр, Азизжон.

Ассалому алайкум "Постда" газетасининг ижодий ходимлари!

Менинг ёшим саксонда. Яқинда Ургут тумани ИИБ паспорт бўлимига мени паспортимни алмаштириш ва набирам Мухлиса Оманова учун паспорт олишга бордик. Бизни паспорт бўлими бошлиғи **Олимжон Маърупов** илиқ кутиб олди ва барча ҳужжатларни расмийлаштириш юмушларини тезда ҳал қилиб берди. Бир пайла чой ичгунимизча Ўзбекистонимизнинг янги фуқаролик паспортини ёзиб қўлимизга тутқизишди, чин дилдан табриклашди. Биз Ургут тумани ИИБ бошлиғи ўринбосари **Шавкатжон Жамолов** ва ходимлар **Фуркатжон Раҳмонов, Зарифжон Маҳмадустов, Шахриёржон Сафаров, Тўрақулжон Ашуровлар** муомаласидан жуда хурсанд бўлдик. Ана шу сидқидил хизматлари учун эл назарига тушган юқорида номлари келтирилган милиция ходимларига **Оллоҳдан узоқ умр, оилаларига соғлиқ-саломатлик тилаймиз. Ҳамиша эл хизматида камарбаста бўлишсин.**

Газетангизнинг ҳар бир сонини кутиб қолувчи 80 ёшли Бувсара ая ЎСАРОВА, Ургут тумани Амир Темур жамоа ҳўжалиги.

Мен ёлғиз она, II гуруҳ ногирониман. Икки нафар қизим бор. Кичик қизимнинг турмуши бузилиб, икки фарзанди билан менинг қарамоғимда.

Мен шонь ойида оилавий шароитимнинг оғирлиги, қизимнинг никоҳи бекор бўлмагани боис ўзига тегишли мол-мулкни ажратиб ололмаётгани ҳақида ариза билан **Шахрисабз тумани ИИБ бошлиғи Х. Сайфуллаевнинг қабулига** кирдим. У киши менинг оилавий шароитим ва моддий аҳволим билан танишиб, менга ва болаларимга жуда катта ёрдам кўрсатди. Невараларимни қийим-кечак, озиқ-овқат билан таъминлади. Мен ва фарзандим Х. Сайфуллаевнинг берган ёрдамидан бошимиз осмонга етди.

Мен сизларга ушбунни ёзиб, она сифатида мамлакатимизда Х. Сайфуллаевга ўхшаган меҳрибон ва бағрикенг инсонлар яна ҳам кўпайсин, уларнинг ишларида Аллоҳ ривож бериб, умрлари узун бўлсин дейман. Ҳамда газетангиз орқали **Шахрисабз тумани ИИБ бошлиғи Х. Сайфуллаев** ва унга ўхшаган инсонпарвар ходимларга менинг миннатдорчилигимни билдиришингизни сўрайман.

Жамила ТУРОПОВА, Шахрисабз.

АЛДАНГАН ВА АДАШГАН САБРИЯ ФОЖИАСИ

Миллатимизнинг иллатли кишилари

Ўзбекистон Республикаси ИИБ ЖООБ ахлоқ-одоб доирасидаги ҳуқуқбузарликларнинг олдини олиш бўлими бошлиғи, милиция подполковниги **Темур Иминов** билан кичик интервью.

— Темур ака, аввало ушбу воқеага ўз муносабатингизни билдирсангиз.

— Баъзилар воқеа билан танишгач, "нима қипти, орамиздан бир суюқоёқ камайса камайибди-да", дейиши мумкин. Лекин ҳали ёш қиз бир худбиннинг алдони ва шахвоний ҳирси сабабли эгри йўлга кириб кетгани, унинг аянчли тақдирида биз катталар ҳам қанчалик айбдор эканлигини таъкидламасдан илож йўқ. Албатта, ҳеч бир ота-она ўз зурриёдига ёмонликни раво кўрмайди. Бироқ орамизда Сабриялар бор экан, фарзандининг номаъқул юриш-туришига бефарқ қараётганлар ҳам кам эмаслиги кўриниб турибди. Алданган ва адашган Сабриянинг хатоси бошқалар учун сабоқ бўлиши лозим.

— Ахлоқсизликнинг ижтимоий хавфли томони нимада деб биласиз?

— Маънавиятимизга путур етказишда. Зинокорлик, зино билан шуғулланиш гуноҳ эканлиги муқаддас ҳадисларда ҳам тилга олинди, қаттиқ қораланган. Ахлоқсизликка берилган қимсалар шарқона урф-одатларимиз, миллий қадриятларимизни оёқости қилишаётганини унутмасликларини истардим. Бу ҳеч бир кечирилмас ҳолдир.

— Хонадонини ишратхонага айлантириб, ойдек қиз-жувонларимизни йўлдан ураётган қимсалар кимлар ўзи?

— Маиший бузуқ, спиртли ичкилик, гиёҳвандлик моддаларни истеъмол қилиш ва чекишга ружۇ қўйган тубан кишилардир. Пойтахтимиздаги кўчаларнинг бирида яшаётган З.исмил аёлнинг қилмиши фош этилди. У ҳеч қасда ишламайди. Эри билан ажрашган. Уй-жойи бир аҳволда. Ичкарига киришингиз билан димоғингизга бадбўй ҳид

урилади. Хонадон бекаси ким бир шиша ароқ ёки вино кел-

Самарқандлик осойишталик посбони, милиция майори **Анвар Ғуломов** ҳикоя қилади: "Эрталаб бошқарманинг навбатчилик қисмидан қўнғироқ қилиб, суд-тиббиёт экспертизасига тезда етиб келишимни айтишди. Маълум бўлишича, шахримизнинг **Амир Темур** ва **Ғагарин** кўчалари кесилиш жойида номаълум жувоннинг мурдаси топилган ва мен унинг шахсини аниқлашга кўмаклашим керак экан.

Айтилган жойга етиб боргач, марҳуманинг юз тузилишини диққат билан кўздан кечирдим. Аёл тирикчилигида жуда келишган, хушбичим бўлгани кўриниб турарди. Уни таний олмадим. Докторларнинг ҳулосасига кўра аёл тахминан тунги 23-24лар атрофида совуқ таъсиридан ўлган, ўлими олдидан эса кўп миқдорда спиртли ичимлик истеъмол қилган экан. Лекин жасадда ҳеч қандай тан жароҳати йўқ.

Суд-тиббиёт экспертизасидан бошқармага қайтар эканман, йўлда ҳаёлга берилдим. Бу нотаниш жувон ким бўлди? Шундай қаттиқ совуқда ярим тунда нима қилиб юрган экан? Бечоранинг яқинлари борми?

Тўша бориб марҳуманинг шахси аниқланди. Ўн саккиз ёшида ҳаётдан кўз юмган аёл, афсуски, **Сабрия** экан. Ҳа, ўша, ўзининг қадди-қомати ва

лактик ҳисобида турган кишилар ўртасида олиб борилаётган огоҳлантириш ишларини кучайтиришга қаратишмоқда.

Тошкент шаҳар ҳокимининг 1998 йил 16 мартдаги "Тунги

яшовчи В.М. икки жуфт эркакаёлни хонадонига 300 сўмдан қўйганлиги маълум бўлди.

Тунда ишлайдиган дискотека, диско-бар, тунги клуб, ҳаммом ва сауналарнинг иш вақтини

фоҳишабозлик, қўшмачилик билан шуғулланиш ҳолатлари ҳамон учраб турибди. Бу иллатни тағ-томири билан йўқотиб юбориш мумкин эмасми?

Милиция подполковниги Темур ИМИНОВнинг мулоҳаза ва таклифлари:

— Мумкин албатта. Жамиятимиз маънан пок бўлишида ахлоқ-одоб доирасидаги ҳуқуқбузарликларнинг олдини олиш, турли тери-таносил касалликлар тарқалишига йўл қўймаслик муҳимдир. Тан олиш керак, кейинги пайтда жоҳиллик, зўравонлик, беҳаёликни тарғиб қилиш ҳолатларини аниқлаб, қонуний чоралар кўриш сусайтириб юборилди. Ҳаёсизларга нисбатан Ўзбекистон Республикаси Маъмурий жавобгарлик тўғрисидаги кодекси бўйича қўлланилаётган жазони кучайтириш керак. "Ахлоқ милицияси" тизимларида ҳисобда турувчи хавфли гуруҳга мансуб шахслар билан умумий ва яқка тартибда олиб борилаётган профилактик ишлар талабга жавоб бермайди. Уларга нисбатан юритилаётган профилактик йиғма жилдларнинг сифати паст даражада. Кўп ҳолларда шаҳар-туман ИИБ раҳбарлари йиғма жилдлар қай аҳволда эканлиги билан қизиқмайдилар, мавжуд камчиликлар юзасидан тегишли кўрсатмалар берилмайди. Кейинги 3-4 йил ичида хорижий мамлакатларда бўлиш (виза) қоидаларини бузиш, у ерда қўшмачилик ва фоҳишабозлик билан шуғулланаётган шахсларни аниқлаш ҳамда қонуний чоралар кўриш бир мунча сусайиб кетганлиги сезилмоқда. Ота-оналар, муаллимлар, маҳалла фаоллари ёшлар билан кўпроқ ишлашлари мақсадга мувофиқдир. Юқоридаги воқеада баёи қилинган салбий ҳолатларнинг олди олиниши, фоҳиа келичиқмаслигида айtilган бу мулоҳазаларнинг ўрни катта, дей ўйлайман.

Саъдулла ШОДИЕВ.

тирса улфатчилик қилаверган. Кечалари яшаш жойининг тайини йўқ дайдилар, енгилеёқ аёллар, тиланчилар шу ерни "макон" қилиб олишган. Ачинарлиси, шундай муҳитда аёлнинг саккиз яшар ботласи ҳам "тарбияланаётган" экан. Қўшмачилик, фоҳишалик қилиб, миллатимиз шаънига иснод келтираётган бундай иллатли кишиларга қарши мурасасиз кураш олиб бориш бурчимиздир.

Вазирлик ЖООБ ахлоқ-одоб доирасидаги ҳуқуқбузарликларнинг олдини олиш бўлими ходимлари асосий эътиборни қўшмачилик, фоҳишалик билан шуғулланувчи, игна орқали гиёҳвандлик моддалари қабул қилувчи, беҳаёликни тарғиб қилувчи маҳсулотларни тарқатаётган шахсларни аниқлаш, ички ишлар идоралари профи-

кўнғилочар муассасалар айрим турларининг фаолияти ва реклама жойлаштиришни тартибга солиш тўғрисида"ги қарори талабларининг бажарилишини таъминлаш мақсадида бир қатор тадбирлар ўтказилди. Текшириш давомида мазкур қарорнинг бажарилишини кўпол равишда бузаётган 12та тунги клублар аниқланди. 54та ресторан, қаҳвахона-бар, тунги клуб ва бошқа кўнғилочар муассасаларнинг раҳбарлари огоҳлантирилди.

Турли хилдаги видеотасмалар билан савдо қилинаётган 35та шохобча текшириб кўрилди. "Ўзбекнаво" бирлашмаси рўйхатидан ўтказилмаган 587та аудио ва 345та видеотасмалар олиб қўйилди. Хонадонини ишратхонага айлантирган икки фуқаро устидан жиноий иш кўзгатилади. Масалан, Лисунов кўчасида

чеклаб қўйиш, уларнинг тонгта қадар фаолият кўрсатиб, бу жойларда хавфли гуруҳга мансуб шахслар тўпланишига йўл қўймаслик борасидаги саъй-ҳаракатлар кўнғилочаридек эмас. Масалан, Тошкент шаҳридаги Қатортол кўчаси, "Болалар дунёси" дўкони, "Россия" меҳмонхонаси ва "Мальборо" қаҳвахонасининг олдида соат 22-00дан тунги соат 3-00гача енгил табиатли аёл-жувонлар тўпланишяпти. Номлари қайд этиб ўтилган муассасаларнинг раҳбарлари бир неча марта огоҳлантирилишига қарамай, фоҳишалар, қиморбозлар, маст-аласт кишилар тўпланишига шароит яратиб беришяпти.

Аҳоли ўртасида мунтазам тушунтириш ишлари, суҳбатлар олиб борилиши, турли тадбирлар ташкил этилишига қарамай

ДИҚҚАТ, КИДИРУВ!

Китоб тумани ИИБ томонидан 1985 йилда туғилган, Китоб шаҳри, Генерал Жўрабеков кўчаси, 237-уйда яшовчи **Улуғбек Ҳамроев** кидирилмоқда. У 1999 йил 30 май куни уйдан чиқиб кетиб, қайтиб келмаган.

Белгилари: бўйи 160 см, сочи қора калта, қошлари, кўзи қора, бугдой рангдан келган, юзининг икки томонида иккита холи бор.

Кийимлари: эғнида оқ еңги калта, чап чўнтагида "Адида" ёзуви бор кўйлак, кўк шим, оёғида оқ резина шиппак бўлган.

Улуғбек Ҳамроев ҳақида бирор маълумотга эга бўлган ёки уни кўрган фуқаролар қуйидаги телефонлар орқали хабар беришларини сўраймиз: 8-(37554) 21-076, 22-716. 22-461 ёки 02.



Наманган шаҳар ИИБ томонидан Наманган шаҳар А. Темур кўчаси 20-уй 23-хонада яшовчи **Соҳиба Маҳмудовна Қодирова** кидирилмоқда. У 1974 йилда туғилган. 1999 йил 11 май куни уйдан чиқиб кетиб, қайтиб келмаган.

Белгилари: бўйи 160-165 см, ўртача гавдали, қош-кўзлари қора, сочлари узун, ўрилган, тишлари бутун.

Кийимлари: эғнида атлас халат, бошида жиғаранг гулли рўмол, шунингдек, қулоғида сариқ металлдан тайёрланган балдоғи бўлган.

С. Қодировани кўрган ёки қаердалиги билганлардан яқин орадаги милиция бўлимига хабар беришларини сўраймиз.

MUNAJJIMLAR BASHORATI 19 — 25 iyul

ҚҲҲ (21 март — 20 апрель)



Душанба кунги учрашув ва сешанба кунги ишингизнинг бароридан келиши ҳафта давомида руҳингизни тетик қилиб, кайфиятингизни кўтарарди. Чоршанба кунги кичик келишмовчилик келиб чиқади. Ҳафтанинг сўнгги кунларидаги ишбилармонлик музокаралари муваффақиятли якунланади.

СИҲИР (21 апрель — 21 май)



Мазкур етти кун мобайнида баракали меҳнат қиласиз. Бу борада, айниқса, сешанба ва пайшанба қулай кунлардир. Шанба кунги эски қадрдонингиз ўзидан хабар беради. Якшанба оқшомида ишқий учрашув бўлиб ўтади.

ЭГИЗАКЛАР (22 май — 21 июнь)



Ушбу ҳафтадан кўп нарсаларни умид қилманг. Душанба кунги бироз ишингиз юришмайди. Чоршанба кунги ҳамкасбларингиз билан низо келиб чиқиши эҳтимолдан холи эмас. Якшанба кунги спиртли ичкилик истеъмол қилманг, акс холда соғлигингизга жиддий путур етиши мумкин. Ҳафтанинг энг муваффақиятли кунги жумадир.

ҚИСҚИЧБАҚА (22 июнь — 23 июль)



Бу даврда ютуқлар ва муваффақиятсизликлар навбати билан алмашиб келади. Душанба ва чоршанба кунлари барча ўйлаган режаларингиз амалга ошади. Сешанба ва пайшанба асаббужарлик билан ўтиши қутилмоқда. Шанба кунги харид қилишга дадил киришинг.

АРСЛОН (24 июль — 23 август)



Душанба кунги ишингиздаги муваффақият катта фойда келтиради. Чоршанба кунги учрашув кўнглидагидек ўтади. Пайшанба кунги алданиб қолишдан эҳтиёт бўлинг. Шанба кунги қутилмаган хушxabардан кўнглингиз тоғдек кўтарилади.

БОШОҚ (24 август — 23 сентябрь)



Ушбу ҳафта осойишта ўтади. Хонадонингиздаги барча юмушларни ҳафтанинг бошида битириб олганингиз маъқул. Жума кунги фойдали битимни имзолайсиз. Шанба кунги эски дўстлар билан учрашув қутилмоқда. Дам олиш кунларини оила аъзоларингиз билан ўтказганингиз маъқул.

ТАРОЗИ (24 сентябрь — 23 октябрь)



Душанба кунги мураккаб ишни ниятсиз етказасиз. Сешанба кунги мўмай даромад ишлаб олиш имконияти бор. Ҳафтанинг охирида саломатлигингиз панд бериб, бошлаган ишингиз ниятсиз етмай қолади. Яқин кишингиз билан шанба кунги мулоқот кайфиятингизни кўтарарди.

ЧАЁН (24 октябрь — 22 ноябрь)



Ҳафтанинг бошида узоқ сафар ва саёхатларга чиқмасликни маслаҳат берамиз, чунки жароҳат олишингиз мумкин. Чоршанба кунги ҳар қандай қийин ишни уddалайсиз. Шанба-якшанба кунлари ижодий ишларда муваффақиятга эришасиз.

ЕЙ (23 ноябрь — 21 декабрь)



Сешанба ва пайшанба кунлари теvarак-атрофингиздагилар билан келишмовчилик келиб чиқиши эҳтимолдан холи эмас. Асабингизни эҳтиёт қилинг. Ҳафтанинг охирида олдинда катта ўзгаришлар қутилаётганини ҳис этасиз. Барвақт тайёргарлик кўраверинг, кўп ажойиб ишларни қилишга улгуришингиз керак.

ТОҒ ЭЧКИСИ (22 декабрь — 20 январь)



Ижод билан машғул бўлиш учун душанба ва пайшанба қулай кунлардир. Чоршанба кунги ажойиб инсон билан танишасиз. Ўзингизни қийнаётган муаммо юзасидан ҳамкасбларингиздан жума кунги маслаҳат олмаганингиз маъқул.

ҚОВЕА (21 январь — 19 февраль)



Мазкур ҳафта тигиз ўтади. Талайгина ишларни бажаришингизга тўғри келади. Чоршанба кунги яқин кишингиз билан жанжаллашиб қолишингиз эҳтимолдан холи эмас. Чоршанба кунги алданиб қолишдан эҳтиёт бўлинг. Дам олиш кунлари саломатлигингизни тиклашга астойдил киришингиз зарур.

БАЛИҚ (20 февраль — 20 март)



Душанба кунги бироз ишингиз юришмайди. Сешанба кунги дунёқараши сезиникига ўхшаш инсон билан учрашасиз. Ҳафтанинг сўнгги кунлари маъносиз келиши мумкин. Бунинг олдини олиш учун дам олиш кунларини оила даврида ўтказганингиз маъқул.

«ГУЛНОРА-ЧЕВАР» ФИРМАСИ СИЗЛАРНИ

ЎҚУВ МАРКАЗИГА ТАКЛИФ ЭТАДИ.

У ерда сиз бичиш-тикишнинг 100 хил бичимларини, ҳар-хил торт пишириқларнинг 50 хилини, бошловчилар учун инглиз тили, сартарошлик, бухгалтерлик касбларини тез, енгил ва замонавий усулда ўрганиб olasiz.

Ўқиш муддати:

3 ойлик:

- Бичиш-тикиш — 1 ойга 1000 сўм;
- Инглиз тили — 1 ойга 2000 сўм;
- Бухгалтерлик — 1 ойга 2000 сўм;
- Укалаш — 1 ойга 3000 сўм;

2 ойлик:

- Торт пишириш — 1 ойга 1000 сўм;
- Сартарошлик — 1 ойга 2000 сўм;

Ўқишни битиргандан сўнг диплом берилади.

Телефон: 75-94-15.

Қабул вақти:

ҳар кунги (якшанбадан ташқари) соат 9.00 дан 18.00 гача.

Манзил:

Чилонзор-11, 60-уй, 32-хона.

Мўлжал:

Чилонзар метроси, "Шўхрат"

дўконидан кейинги "Ал-Хоразмий"

бекати.

ЭЪЛОН

Ўзбекистон Республикаси ИИБ ҳузуридаги

«Қуриқлаш» Бирлашмасига

18-23 ёшлардаги қизлар котиба-машинистка вазиасига ишга таклиф қилинади.

Мурожаат учун манзил: Тошкент шаҳри, Бобур кўчаси, 60 а-уй.

Маълумот учун телефонлар: 136-77-75, 139-78-17.

Ўзбекистон Республикаси ИИБ Нақлиёт ИИБ раҳбарияти ва шахсий таркиби Термиз бекати тармоқ ИИБ бошлиғи, милиция подполковниги Х. Маманорова онаси

Улуғбой момо ҚУЛИЯРОВнинг

вафот этганлиги муносабати билан чуқур таъзия изҳор қилди.

Тошкент шаҳар ИИББ раҳбарияти ва шахсий таркиби автоҳўжалик бошлиғи, милиция майори Б. Муҳамедовга надарин бузруквори

РУСТАМБЕК отанинг

вафот этганлиги муносабати билан ҳамдардлик билдиради.

Ғаллаорол тумани ИИБ раҳбарияти ва шахсий таркиби ИИБ участка вакили, милиция капитани Э. Оқмирзаевага қизи

МАШХУРАНИНГ


бевақт вафот этганлиги муносабати билан ҳамдардлик билдиради.

ЭНИГА: 7. Озарбайжон мумтоз шоири. 8.

Масжиднинг намоз ўқилган кенг хонаси. 11. Тўпли спорт ўйини. 12. Амир Темур томонидан оқила-ю зукколиги, тadbиркорлиги эвазига умр йўлдошига берилган ном. 14. Қозоғистондаги қўл. 15. Испаниянинг шимоли-шарқдаги тарихий вилоят. 16. Милоднинг илк даврларида вужудга келиб, V — X асрларда йирик савдо-хунармандчилик марказига айланган Бухоро яқинидаги шаҳар. 17. Мактуб тарзида ёзилган асар. 19. Яқин киши, падар. 20. Ўзбек маърифатпарвар шоираси, биринчи журналист аёлларидан бири. 23. Ҳосил. 26. Ширинлик тури. 28. Ўзбекистон халқ артисти Ғуломжон Ёқубов ижросидаги эстрада кўшиғи. 30. Маълум бир уруғ ва авлодларнинг келиб чиқиши ва ўзаро қариндошлик даражасини кўрсатувчи рўйхат. 32. Рўзгор буюми. 33. Тошкентнинг қадимий дарвозаларидан бири. 34. Мактабдаги муқаддас зиёратгоҳ. 35. Расмий йиғин. 36. Таниқли авиаконструктор.

БЎЙИГА: 1. Қорақалпоғистондаги шаҳар. 2. Марказий Осиёдаги асосан туркий халқлар яшовчи ҳудуд. 3. Шарқ мумтоз назмига хос жумбоқ. 4. Африка шимолидаги давлат пойтахти. 5. Самарқанд шаҳрининг қадимги юнонча номи. 6. "Дунёнинг ишлари" қиссасининг муаллифи. 9. Миллий ширинлик. 10. Оврупадаги давлат пойтахти. 13. Бирор шахс, муассаса, ташкилот, давлат номида иш юритиш учун берилган ҳуқуқий ҳужжат. 18. Кишилар, ташкилотлар ўртасидаги муомала. 19. Миллий мусиқа асбоби. 21. Суяқ ёки қаттиқ жинслар аралашмасини бир-биридан ажратадиган қурилма. 22. Қадимда давлат ихтиёридаги мол-мулк ва шу бойлик сакланадиган бино. 24. Урим ипак, арқоғи зардан тўқилган миллий газлама. 25. Инсоният тарихий йўлининг тараққиёти ва муштараклиги ғоясини олға сурган америкалик та-

КРОССВОРД



рихчи ва этнограф олим. 27. Бирор муҳим нарсани аввалдан айтиб бериш. 29. Амалга оширилган вазифалар юзасидан юқори ташкилотга маълумот бериш. 31. Вулқондан отилиб чиққан жинсларнинг таркибий қисмини ташкил этувчи маъдан. 32. Савдо-сотик ёки хунар билан шугулланиш учун берилган ҳужжат.

Фозилжон ОРИПОВ тузди.

ГАЗЕТАНИНГ АВВАЛГИ СОНИДА ЧОП ЭТИЛГАН КРОССВОРДНИНГ ЖАВОБЛАРИ:

Бўйига: 1. Тирана. 2. Калтак. 3. "Чорсу". 4. Хиромон. 5. Амалиёт. 6. "Кодек". 7. Пистон. 8. Мезана. 15. Чодирхёл. 16. Австралия. 17. "Ақбарнома". 18. Рамақижон. 20. "Эрали". 21. Тилак. 22. Шаржа. 23. Радар. 29. "Титаник". 30. Суриков. 32. Ораста. 33. Ипакли. 35. Раимов. 36. Овидий. 37. Қолип. 38. Челақ. **Энига:** 3. "Чархпалак". 9. Кимано. 10. Офицер. 11. Эрмат. 12. Партоқ. 13. Антуан. 14. Узумчилик. 15. "Чайка". 17. Аневар. 19. "Унита". 24. Ибратли. 25. Алабама. 26. Халфана. 27. Жаннати. 28. Отаси. 31. Ловия. 34. Армон. 37. Қайтарғич. 39. "Санамо". 40. Елиқчи. 41. "Оникс". 42. Итоғли. 43. Ақобир. 44. Полковник.

O'ZBEKISTON RESPUBLIKASI IIV BIRLASHGAN TAHRIRIYATI

MANZILIMIZ:

700029,
Toshkent,
Yunus Rajabiy
ko'chasi, 1

Gazeta haftaning juma
kunlari chiqadi.

**Bosh muharrir
Zokir ATAYEV**

Muharrir

Erkin SATTOROV

(Bosh muharrir
o'rinsosari v.b.)

Navbatchi:

S. SHAMSIDDINOV

Musahhihlar:

M. AKRAMOVA

G. XOLIQOVA

Sahifalovchi va dizayner:

A. MIRZAMUHAMEDOV

TELEFONLAR:

Bosh muharrir

o'rinsosari — 139-77-23.

muxbirlar

bo'limi 139-75-69.

Faks 54-37-91.

Gazeta tarqatish masalalari

bo'yicha murojaat uchun

faks: 54-37-91,

peyjer: (088) 36-97, 55-19.

Reklama bo'limi

peyjer .. (088) 55-54, 55-19.

Bizning hisob raqamimiz

O'zbekiston Respublikasi

Markaziy banki

Toshkent shahar Bosh

boshqarmasi hisob-kitob —

kassa markazida:

21506000200447980001,

MFO 00014.

• Ko'chirib bosishda «Postda» dan ekanligini ko'rsatish shart

• Maqolada keltirilgan raqamlar, faktlar va boshqa ma'lumotlar, shuningdek, ochiq e'lon qilinishi mumkin bo'lmagan ma'lumotlar uchun muallif javobgar hisoblanadi.

• Muallifning mulohazasi tahririyat fikriga mos tushmasligi mumkin.

• Qo'lyozmalar tahlil qilinmaydi va qaytarilmaydi.

Gazeta IBM kompyuterida terildi va sahifalandi.

Ro'yxatdan o'tish tartibi № 00007.

Buyurtma Г — 0554.

Hajmi — 4 bosma taboq.

Bosilish — ofset usulida.

Bosishga topshirish vaqti — 19.00.

Bosishga topshirildi — 18.00.

Obuna raqami — **180**

73 680 nusxada chop etildi.

«SHARQ»

nashriyot-matbaa konserni bosmaxonasi.

Korxona manzili:

Buyuk Turon ko'chasi

41-uy.

1, 2, 3, 4, 5, 6.